

四庫全書

集部

欽定四庫全書

集部

吳郡文粹續集卷二十一

詳校官庶吉士臣朱理

侍讀臣孫球覆勘

總校官進士臣繆琪

校對官主簿臣汪日贊

謄錄監生臣沈應麟

欽定四庫全書

吳郡文粹續集卷二十一

明 錢穀 撰

山水

遊郡西諸山記

都穆

弘治己酉秋九月甲戌子與客汎舟將遍遊吳郡西諸  
山客曰虎邱之勝甲吳下且密邇闌闌遊必自虎邱始  
子諾焉亭午至山下觀憨憨泉泉為人投瓦礫塞之將  
泥不食從石旁上東山廟即短祠中龐然禡以土偶有老

僧方閉關坐穴中與語頗可聽下東山北行登千人石  
旁有古木根出如蟠虬一本而為榦者三經清遠道士  
放鶴礪礪涸灌莽生焉後人亭其上既而登五聖臺僧  
供茗命前導西南行至一菴甚幽寂蓋宋和靖書院舊  
址也悵惋久之南行沿小溪復上千人石度石梁酌陸  
羽泉近庸僧屋其畔頗減清冽出觀劍池左石刻虎邱  
劍池四大字是顏魯公書上兩厓壁立數仞勢欲崩裂  
其陰多昔人題名衆恐不能久讀遂登可中亭北有李

陽永篆生公講臺字分鐫四石而亡其一衆皆從故道  
下去時已逼暝予欲止宿客不可乃返乙亥乃泊虎邱  
午食出射瀆大風西北來舟遲遲行綽屢斷續西望天  
平乍粵秦餘抗諸山如龍遊馬逸應接不暇過澣墅入  
竹青塘而西日光反射影在山半霞彩絢爛丹青襍施  
工不能繪至通安橋已昏黑夜深抵友人朱氏宿丙子  
早食出朱墅北泛彭山堰午西風甚急遂由堰西北約  
五里至陳湖莊復五里由望湖橋南出游湖從曲港登

新豐南山共坐苔石山人有牧羊者予問瀕湖諸山始知高出鄧尉者曰銅坑山亞銅坑曰安山牛城嘴居游湖北與安山對峙如兩峽然而其西接太湖極北青霞一抹視洞庭兩山尤遠者無錫之九龍山也下山歡飲盡醉丁丑早霧翳翳布空中疑有變少焉日光曛曠衆遊興勃發由謝莊西行復經游湖南過陸家港二里入西堰水益緩山益近岡嶺稠疊橫迴峭拔呈技獻巧殆不可狀而浮圖七級聳龜峰巔影落水中予笑曰此王

摩詰得意筆也泊秦定橋登虎山里許至光福寺主僧  
聞客至出速入方丈山峙其前者名鉢孟其左鄧尉山  
也辟有元人聯句詩多剝落皆不著氏名其字書類王  
豫章有墨沼從窻隙窺之僧云傳為顧野王研池殆或  
然也過齋堂讀唐進士顧在鎔詩刻遂上龜山坐浮圖  
下浮圖頂有巢鶴三見人嚶嚶作聲衆方欲酒僧謂七  
寶泉在鄧尉東麓不三里而近共出登舟經東堰已半  
淤塞蘆葦叢生其中視西堰少劣至則捨舟導山徑行



夾道多古梅長松入僧菴有雙柿丹寔累累可愛上山  
行循竹間有亭憩焉其後即七寶泉泉生石間環甃以  
石形如滿月深尺許掬飲甚甘僧接竹引之然不知發  
自何處且弔陸子之不能遭與茲泉之不遭也予索筆  
題名亭上暮還光福方丈戊寅至姚家河陸行數里遊  
奉慈菴中故有養賢樓元季里儒徐良夫好客四方賢  
士多集樓上今亡獨扁存堂背白山茶枇杷臘梅列植  
左右出僧欲導觀山上泉不果三里至玄墓山從松篠

間偃僂而上山多楊梅樹湖水明滅樹間衆冉冉如  
空中行約一里入西塔院小飲晚院之僧具湯沐宿焉  
己卯自西而南四百步路多古梅皆螭蟠蛟結蒼蘚被  
之如鱗出大道東北千步有長松五株鷹巢其一又西  
北二百步度石梁上萬佛閣南望太湖法華山橫亘其  
中漁舟數十出沒若鳬雁然而洞庭長沙葉余梅灣諸  
山隱隱在烟霧間詩思頓發自北而東二百步有僧揖入  
小閣閣視萬佛十才一二然所據地高出木杪山四面

環之如玦景特奇僧飯客閣上仍出松花餅客作詩有  
不見太湖真面目眼前終恨法華山之句予不以為然  
乃作詩為法華訟冤西行可百步至僧房其扁曰天開  
畫圖見湖最多兼見小橫山一抹由禪堂西南三百二  
十步有老僧房前美竹數百挺與松栢爭長地窪然下  
衆嘯咏焉又西三百步經僧房六已日暮不及遊還塔  
院宿庚辰僧陪客下山西行復經奉慈菴謁宋金紫光  
祿大夫黃某墓其傍有香火院僧盡出斷碑五六橫草

莽間蓋玄墓至是行四里至銅坑山其山一名銅井僧  
云高二百丈予與客取捷上由別道山多亂石且峻拔  
行者多顛踣每一人踣衆皆大笑至僧菴觀所謂銅井  
已無水深可丈餘上大石若將壓者予令童子入井大  
呼聲不得出如甕中山頂多奇石可望見二百里羣山  
在其下小山浮湖中如杯人大快以為平生奇觀適  
山人送酒至遂剖橘作杯飲皆盡興菴僧煮菜供午食  
循道至山半勢亦斗峻皆掖以童子狼狽而下回視莫

不心掉更慶以為無虞去銅坑東北三里謁宋章都官墓抵包河登舟復從西堰過秦定橋東北七里還朱氏宿辛巳朱氏東南三里至蜀山訪王清獻公玄孫晉索其舊藏出清獻畫像及孝感詩族譜閱之門內有塑像置壁脚亦云是清獻公牆角塑像為尼相者清獻母張夫人也晉言清獻父死海上張氏年甫三十七抱清獻入覲時清獻生才三歲元主恐張氏二志命殿前祝髮為比丘尼賜號無為大師往往吳中妙湛禪寺出門讀

草間碑碑凡三其一為大師塔銘鄧文原撰午還朱氏  
壬午復經彭山堰行八九里艤舟又二里至秦餘杭山  
夾道松如步障上六百步息足僧舍復二百三十步至  
大石下有泉二泓其一為雲泉石錯互若頽頷斷齟從  
其後視之又若狻猊印首尻下其前磐石如卧鼓可坐  
二三十人入雲泉菴躋石級有古梅生石間東折石一  
股西跨類猛士跂足立人行其下又折而西鑿石為階  
旁設以闌柵視不可凭屋壁讀李武選吳太史張子靜

史明古諸公聯句東行有巨石閣厓上欲墮又上得大石岩上俯下嵌中像開山像衆小憩午酌菴之北樓日暮下山與諸客別是夕宿通安橋癸未入城蓋自甲戌至癸未凡十日皆風日清美舟楫往還百數十里歷名山六小山二而諸客者皆衣冠詳雅從容尊俎間莫不目飽意滿充然有得而忘其疲其慶幸不既多乎遂次第筆之以貽同志

紀遊

朱存理

端陽前一日過西崦訪朱叔英西崦舊遊也叔英故人  
也叔英喜予至速予登其新堂拜尊人八十三翁頃具  
蒲觴為飲襟以山果溪鮮勸酬盡醉留別有詩云西崦  
重遊日東城闊別時新堂陪杖几舊譜合宗支碧柳垂  
書幌紅葵映酒卮烟消聽欵乃風遠送吾伊好古吾同  
志尋幽君有期歸舟山色暝正是雨催詩予之來也為  
訪吳中故家文獻叔英不以為迂言王清獻公家蜀山  
不二里家有藏譜乃為之假故有好古吾同志之句飲



散登舟將數里至光福尋張雪槎雪槎與予論別將三十餘載相見各驚皤然為詢野王雪槎告以故吾張氏從顧姓今始復之矣尚不忘其初作推本堂有瓠翁首倡五言請予和之不及書即延入鄧尉山後鳳岡之前一草亭中治鷄黍相款讀其所自為草亭記雪槎請留題予羨其老年有此行樂喜為之賦七言一章鄧尉嵯峨萬疊青鳳岡猶見地稱靈梅林數畝開新徑蘿薜千尋闢廣庭博望古槎仍剡曲醉翁今記似蘭亭岩花谷

鳥供行樂日日春風不用局晚同遊光福寺寺僧普照  
及其徒曉谷出茗供引客入方丈觀唐人詩刻野王墨  
沼是夕宿山中為賦詩云短策行行一里餘松林過雨  
步徐徐半泓墨沼窺遺跡數仞龜峰望遠墟石磴夏涼  
青荔合山扉晝掩綠蕉舒夕陽窺兀浮圖影送目長天  
晷晷如再請作龜峰記未暇復也明日飯於塔下而別  
便道訪官橋葉氏求觀宋金紫公之譜主人宗佩甫猶  
子秉衡出示之且幸及觀宋誥敕四道葉氏之居在雅

宜山下滄灣修竹逶迤石徑中而入登堂治具歡若平生亦為經宿之留明日別宗佩有詩野人夙昔抱幽期每愛官橋風景奇水竹當門朝爽處山雲入座夕佳時雅宜望去無三里金紫傳來是一支既醉不勝臨別意從前應恨識荆遲慈溪鍾正之昔有一日之雅適主賓塾乃得笑談尊俎之間又可以為樂也日未晡過木瀆登靈崑山而返抵舍已迫暮篝燈湯書時戊辰歲也野航居士

清明後一日獨遊西山

楊循吉

淨揩雙眼洗心腸  
領納山光與水光  
到面春風未全暖  
離城野興一何長  
青黃不接麥苗短  
紅白間開花蓋香  
隨處有茶堪接納  
禪林三四遠相望

將遊西山道中

竹轎晨登數里迂  
羣山膏沐迓吾徒  
樹枝拂帽忽低首  
水影照人堪數須  
牛犢維門角如栗  
梅花塞路雪成珠  
白龍廟中一觀憇  
祀罷野人方會醺

赴西山雨後溪行

皇甫湜

沂艇看山去溪流行更深  
春城過雨色芳草入霞陰  
湖繞連雲度風迴灌木吟  
今宵誰與晤慧遠在東林

雨後舟行望大石諸山

暝遊清溪上虹雨開西岑  
纖月照幽意虛舟鳴夜琴  
寥寥翠微靜靄靄芳樹深  
雲徑空如此彌年違素心

次韻天全公招遊西山

祝顥

征袍洗盡宦途塵  
喜荷招遊引興新  
物外追尋多勝事

座中觴咏摠儒紳青山不厭重來客黃菊偏娛暮景人  
況有雄章傳太史蒼厓磨勒照千春

洞庭兩山賦

王鏊

楚之湖曰洞庭吳之山亦曰洞庭其以相埒邪將地  
脉有相通者邪郭景純曰包山洞庭巴陵地道潛達  
旁通是未可知也而吾洞庭寔兼湖山之勝始山特  
為幽人韻士之所栖靈僊佛子之所宅至國朝名臣  
徹爵往往出焉豈湖山之秀磅礴鬱積至是而後泄

於人邪東岡子曰山川之秀寔生人才人才之出益顯山川顯之維何蓋莫過於文兩山者秘於古而顯於今其寔有待子無用辭予曰然乃為之賦其詞曰吳越之墟有巨浸焉三萬六千頃浩浩湯湯如滄溟漭渤之茫洋中有山焉七十有二眇眇忽忽如蓬壺方丈之彷彿日月之所升沉魚龍之所變化百川攸歸三州為界所謂吞雲夢八九於胷中曾不蒂芥者也客曰試為吾賦之夫太始沕穆一氣推遷融而為湖結而為山

爰有羣峰散見疊出於波濤之間或現或隱或浮或沉  
或吐或吞或如人立或如鳥騫或如鼉鼉之曝或如虎  
豹之蹲忽起二峰東西雄據有若巨君彈壓臣庶又若  
大軍之出千乘萬騎旌幢寶蓋繚繞奔赴東山起自莫  
釐或騰或倚若飛雲旋飈不知幾千百折至長圻蜿蜒  
而西逝西山起自縹緲或起或伏若驚鴻翥鳳不知幾  
千萬落至渡渚迴翔而北折試嘗與子登高騁望近則  
重岡複嶺谿呀摩豁縈洲枉渚蜚蟪緬邈遠則烟蕪渺



瀾天水一碧帆影見而忽無飛鳥出而復沒靈岩則返  
照孤棧弁山則輕烟一抹此亦天下之至奇也若乃長  
風駕浪散山欲野足使人魂驚而汗駭及其風日晴熙  
穀紋漣漪又使人心曠而神怡至於瑤海上月流光萬  
頃星河倒懸蕩漾山影又一奇也遙山霽雪凝華萬疊  
玉鑑水壺上下相合又一奇也風雨晦明頃刻異候烟  
雲變滅咫尺殊狀雖有至巧莫能為像試嘗與子弔古  
尋幽則有迴岩穹壑竄窳相通琳宮梵宇暮鼓晨鐘壽

藤靈藥美箭長松金庭玉柱石函寶書靈威丈人之所  
窺也貝闕珠宮繡穀鳴璫柳殺書生之所婉也翠峰杜  
圻范蠡之所止息黃村角頭綺皓之所從逝也而闔閭  
夫差之跡尤多存者玩月之渚銷夏之灣牧馬之城園  
虎之山練兵之瀆射鶚之巒出金鐸於淺瀨逸梅梁於  
驚湍他若毛公燒丹之井蔡經煉藥之墩聖姑絕雄之  
塘雪竇降龍之淵其石則爰業嶙峋瘦漏嵌空牛竒章  
有甲乙之品宋艮岳有永固之封其泉則困淪膏沸甘

寒澄碧墨佐君表無礙之名天衣禪留悟道之跡斯地也昔孫尚書欲卜居而未能范文穆思再至而不果豈如吾人生長茲土依岩架棟占野分圃散為村墟湊為闌闌桑麻交蔭鷄犬鳴吠里無郭解劇孟之俠市無桑間濮上之音婚姻相通若朱陳之族理亂不識若武陵之源佛狸之馬跡不到周顒之俗駕自旋星應五車地絕三斑盧橘夏熟楊梅日殷園收銀杏家種黃柑梅多庾嶺梨美張谷雨前茅茗蟄餘萌竹水族則鱖鯪之白

鱠殘之銀魴鱸鮒鮓自昔所珍吾且與子摘山之毳掇  
野之茸割湖之鮮釀湖之醲泛白少傅月夜管弦之舟  
和天隨子太古滄浪之歌弔吳王之離宮扣隔凡之靈  
窩凌三萬頃之瓊瑤覽七十二之嵯峨其亦足樂乎彼  
岳陽彭蠡非不廣且大也而乏巍峩之氣天台武夷非  
不高且麗也而無浩渺之容蓋物不兩大美有獨鍾茲  
謂人間之福地物外之靈峰是固極遊觀之美而未知  
造化之工且夫天地之間東南為下非是湖為之尾閭

洩之瀦之則汎濫橫溢江右之民其為魚乎懷襄之世  
湖波震蕩非是山為之砥柱鎮之繞之則奔激暴鬪湖  
東之地其為沼乎唯夫天作之寬以納以容地設之隘以  
襟以帶禹順其流分䟽別派三江既入萬世永賴而後  
吾人乃得優遊於此蓋至是而後知造化之意深神禹  
之功大許曰吾何歸乎吾將歸乎湖上之青山世與吾  
而相遺超獨邁其逾遠海山兜率不可以驟到非茲峰  
之洵美兮吾誰與寄此高蹇

洞庭山賦

孤嶺子賦吳山已精神費勩弛就寢便體曹騰之際忽  
遲一士疎肩高顙兀然安止而讓予曰往昔良史寸善  
必取子何以蒙宅波心居水滢弗獲儕陸處者是齒却  
與蓬萊方壺邈置溟津荒唐弗經者同一見棄邪子猶  
栩栩覺則蘧蘧緬思所以適有古間先生由震澤至其  
容凝重與夢者無異予揖而叩之為道洞庭之自曰雄  
矣哉其形穹崇其氣鬱蔥嵒嵬截薛湯衍龍窠圍百四

十里高千二百弓宣布靈神品彙所鍾儔類並列共七  
十二峰環以巨浸正當太湖之中曰維縹緲上有岫穴  
藹喬雲吐霽虹虜豁崆峒拔萃為宗下有林屋亦曰禹  
洞豁開窅窅杳邃莫窮巉嶮兮儼駘蕩之魏殿南北峨  
眉王屋達其西東內有金庭玉柱銀房錦鋪鍾乳瓊英  
之粲紫泉白芝之腴岩雷羣飛石燕沙盆四足龍魚玄  
衣使者入聆浪聲砰耳靈威夫人出探治水靈符號左  
神幽虛之天誠仙官真人之都壁上堊書隔凡可攷岩

間靈跡振古不誣爰有丹臺神景宮側昔多至人葆形  
煉魄漢室劉根成道綠毛被夫肘腋更有得真尸解尤  
有冲霄拔宅峭壁削下直壁戴上古賢題刻騷裏蹄涔  
猶在石鼓神鉦可擊歲遣投龍醮祭號為福地靈跡其  
左之支也翔焉鳳凰矗焉金鐸崦邊遺二老之歌唱冢  
頂掘九石之獲落婆娑樹兮長青絲竹音兮間作亦有  
龜頭相配紅鶴採夫玲瓏貢獻存夫形像犂确至今工  
匠資用碑碣紀功雕琢膚潔者製玩具胎斑者就研璞



聖姑靈兮爭携賽耐玄夫怪兮猶存蛻殼其右之屬也  
嶺分王夏步稱大小慈里聚人烟兮鷄犬聞乎市心華  
峰構梵宇兮殿閣聳乎雲表亦有植頭馮嶠湯坎金家  
雷鳴石坡最古而賢兮號曰角頭名重商顏兮配夫四  
皓出輔漢儲兮羽翼何鴻飛冥冥兮遂杳尚留來裔兮  
雖繁皆事隱遯兮就老其前麓兮則有躩踞赴水儼若  
蚪龍欲掀播乎濤浪將吸呼乎雷風垂涎渟兮甘冽休  
殘鑿乎妄庸佔位明灣兮儼織之機杼嵯嶮圻甸兮猶

單之鷄籠何延佇之危石作偃僂之老翁其後趾兮則  
有噴塘二里新安墩頭砂颺子兮涵遠峰湖湧浮兮壓  
芳洲平湖嵐兮雲霏小湖池兮甌窰乃若其中則有邵  
舍馬石堰黃電紫炭浮一溥兄弟父子天壇玉童之乘  
飈石穴黃金之化特秦黃葉之三家蔡王毛之諸墓龜  
背綠車白茅繞步張彈子之堪擲陸摸壁之可覩天王  
壽查之攢雲可盤桃花之闌路石屋嵌空枝頭垂露羅  
漢據座乎上下二方飛仙拋壺於野竹諸鵑或顛跂而

拱立兮或矯傲而却顧此皆其所有之名號與態度也  
至若山之所生庶黎奠居至為稠密聚鎮成市比次鱗  
櫛栳棟布翼薨楹湊戢亦有湯散墟墅什伍駢集延師  
教子詩書是習於中豪賈鏹利貨殖街盈乾闥齊物平  
糴亦有離家旅估索理糧裹駕巨舶乘弘舸揚荆襄之  
帆鼓瀟湘之柁已西粵南無往不可但務資崇阜陵奚  
懾躬蹈坎圻遂致羸同猗頓侈竝烏倮茲山萬室處者  
數而出者夥也山之所產稼穡惟艱桑柘攸廣養蠶拾繭

堆雪填幌盆手縑絲呼媪擘纊或衣或貿乃織乃紡是  
家相襲而里相倣徧種果實既繁且美張公大谷之梨  
梁侯烏脾之柿周文弱枝之棗房陵朱仲之李宦嬰陟  
鵲耀緋綻紫蒲萄林檎銀杏石榴三桃櫻胡二李粉緞  
枇杷楊梅楨柯綢繆杏梅椒棣筐貯籠收種類夥襟惟  
柑與柚橙橘大小金碗紅豆味甘蜂脾可奪色蒨蟾血  
堪鬪霜風園圃璀璨錦繡興販南北遠近鬻售所謂千  
頭木奴可埒封君之富也若是其山之生息不亦蕃乎

曰未也其他岌義附麗同時茲水長沙葉余謝姑售亭  
兩雷雙獄陰橫琴帟獐頭鹿頭筆格衣杵南烏石蛇岵  
舍厯耳衝湯浮貢望夫玉柱石牌籃撈三山鷹嘴澤厯  
王舍湖鼉猫鼠箭浮白浮五姑西里其名近百莫可殫  
舉或任浪舂撞或可人居處處者種植勿異勤收者孳  
利同一致皆崇卑遐邇散列四裔若是其山之疇類不  
亦庶乎曰未也林屋震方十里水程有山巍峩鬱然蒼  
青伍員迎親以養夙標胥母為名迄後隋代將軍構第

偉弘郡乘載號莫釐亦依鄉氓所稱比之西山稍亞今  
摠謂之東洞庭是山也席溫法海碧螺翠峰上金白沙  
象鼻芙蓉洎二平三灣皆在厥內益廣而增雄至若豢  
虎射雕王巷長圻韓仙豐壁龍井大龜與高峰雞栖皆  
在其傍添秀而飭奇蓋可與西山匹之其民劇繁墟鎮  
市闐業擅商賈積習懋遷藝植果品育產絲綿亦可與  
西山儷焉猶未足為勝尚其大者焉吁山因人而其靈  
始著地因人而其譽乃揚麻姑獲稱於太伯諸葛顯跡

於南陽原夫天下之奇山川必生奇士以受天之慶

叶荒

茲山之中有經書萬卷拄腹撐腸作為文章汗漫焯煌  
里選鄉舉進謁廟堂臨軒策問對天鋪張陳大義通乎  
天人挽斯世抵於虞唐聖顏霽豫曄然輝光鴻臚唱名  
賜進士第一領三千英俊之班是為天下之福者乃出  
於其鄉又有神思藻發天質秀穎五車熟於攻研萬言  
成於俄頃攄聖賢之蘊奧極穹壤之高迥既發解於舊  
京雙獨步於南省翰林鉅公得之珍異文淵碩卿見之

首肯登春榜第一表三場程式之綱領是為天下之才  
者亦出乎斯境斯境也前乎此者已有折天香踏鰲頭  
使番邦善咨諏參薇垣之大政闡方面之嘉猷及其典  
兵政於夏官握軍戎之樞密贊旬宣於甌閩重糧賦之  
儲積其所產人才果何如是里也後乎此者尤有躡雲  
梯探月窟戕鐵冠簪白筆山岳為之動搖豺狼因之斂  
跡及有明刑弼教謹夫三尺平反推讞之公詳摘伏審  
情之精覈其所出人物又何如以至鄉闈拔科彬彬之



倫泮黌修德濟濟之輩文物丕振為中吳之最若乃草木禽魚珍怪會萃充牣乎內悉不暇計弧擴子曠然若失矍然若悸進而嘆曰溟渤渺茫以蟲測之不過一滴之濡叢林蓊鬱以鷗息之不過一枝之寄邾婁之訾綿邈僅於尋咫尺俾僞之覽峻極惟在崩巍若先生者乃吞雲夢八九曾無胸中之芥蒂走何可跂哉莫闔靈均長卿之門而濟其馘那弗辭義俳淫而累乎已鄭郊鼠腊之璞遠東白頭之豕枉為同邑之晚生徒事尋章而摘

句遂爾跼蹐無地其顙有泚先生曰庸何傷哉無所不知之謂智無所不通之謂睿此幾於聖者能之下此微如金刀之子不能許其博記非莽大夫之流烏能擅其識字且世多瞽瞍昏瞶寤醉黑白罔分方正倒植鄙夫寡識宜爾哉語畢就逝予不能援長揖判袂搔首踟躕悵悵而已

太湖諸山記

王鏊

太湖之山七十二其巍然雄峙起伏於東西者兩洞庭

偃然橫絕而北首者馬跡自西而南逶迤明滅於天際者衝湯橫三山此皆有居民村市里巷多橘柚茶椒桑梓之利東洞庭之東雲水明麗望之若斷而聯者武山其北穹然若立碑者石牌突然而贅出者餘山其首銳而未岐者箭浮若屋而欹者王舍王舍之南為苧浮有若葉筏於水者大筏小筏有若籃入水其耳可見者驚籃有若馳於前後追而及之者貓鼠有若船者浮山橫絕西南者三山三山之南為澤山厥山西洞庭之北有

若隆然而曝水次者龜山山多石可碑又北為長沙又  
北為葉余有若石笋巖薛對立者玉柱稍却者金庭有  
若飛而欲集者南鳥既集而啄者北鳥二女娟好背而  
立者謝姑其南為岷山若人戴笠者帽山若房者舍山  
五峰竝起若不相伏者五浮若五浮而少二者筆格驤  
首掉尾勢欲逝者石蛇若螺者青浮其西大雷北小雷  
世傳二雷相近而不相見見則風雷作小雷之北點點水面  
若人者若禽者若馬驟者若器浮者為大小竹東西獄

衣杵噴浮陰山橫山紹山大干小干若琴者為琴山衝  
湧之北若沉若浮為厥浮殿浮白浮又北為大貢小貢  
又北為茅浮若五星參錯五石浮又北為思夫山馬跡  
東可十里為杜圻南為夫椒夫差敗越處也與夫椒對峙  
而差小者小椒西北錢堆有嵒冠立者獨山若二儿可  
凭者大岫小岫若雙鳬欲止者二鴨若老人鑿折相向  
者大墮小墮然其最大而名者兩洞庭也

遊林屋洞序

有詩

包山之西有洞焉曰林屋廣可坐數十人石皆谿訝中空紺碧深翠夏則涼冬則燠雨入則晴晴則陰森若欲雨者正東有石橫道匍匐可入入則豁然大明行數里有石牀石鉦金庭玉柱柱之上有字曰隔凡相傳吳人嘗遣人窮其境數日乃出宣州世莫知其然否而故武功伯徐公嘗至玉柱之側見隔凡字云弘治十三年三月水部郎中傅君曰會以治水至山中公暇約予同遊予以治任北上不及偕君遊之明日以詩寄予曰奇矣

奇矣乃作亭於洞之口使遊者憩焉予生長山之東於  
所謂林屋洞者嘗一至其處其於所謂隔凡者志欲一  
詣焉以驗其然否而竟未之能也物有近而難至者豈  
謂是歟聊因傳君之遊和其詩并鑱之亭上

隔凡深處禹書存尚有神靈為守門穴底玉泉流作永  
岩前碧月過留痕燕飛尚驗晴為雨龍戰猶疑數應坤  
聞說遙遙天漢接胸中雲夢不須吞

游林屋洞記

蔡羽

己丑五月十一日通州盤屋焦公被孝豐之驚事寧且  
還聞林屋洞之勝期與四三士往觀而羽與時霖霖未  
欽客各求道取疾有頃咸會於洞門天亦霽有小亭與  
門侍從解冠履釋方袍為山行裝南行繞丙門出於陽  
谷之上趺于石壁壁高盡見太湖之境從者曰前有曲岩  
復下壁攀木行里許次於岩畔自亭逮丙門暨陽谷曲  
崑皆五步一石十步一潭巉巉焉獸蹲淵淵焉龍伏泉  
瀲瀲行樹根攬栢翳去豐草然後得一伸足靈祐道士



曰此毛公壇水也壇距洞且十里而南流出於洞門大者成川小者為潭為澗用是茲山之樹青蔥堅翠少花而多根焦公有山水之趣與客嵌名岩中還至亭下從者已在洞平坂矣靈祐道士習於乘橈橈以先驅洞口微隘稍前得夏屋穹然黑颯然豎毛髮左右請火公命列炬壁間下燭瀦瀦上照銀屋石鐘倒懸無慮數十夾屋為石牀丹竈道士曰茲所謂金庭玉柱者也然距石樓神鉦尚遠道士內鳴鉦外奏樂客各據牀屑石鐘仰

砥乳穴暑月如盛寒如是者凡幾室而室室不同乃縱  
左右各為向道或之內門或之陽谷屏處或若斷絕而  
無不穿漏惟之隔凡者久許方有人聲還報火屢滅不  
能進羽怪茲山大不踰他峰而中包空洞莫知攸際靈  
威丈人所言有無不可知求諸隔凡以外亦已異已果  
幽明之境殊豈造化者設是神巧不得而窺邪出洞門  
日已暝煮石乳飲訖各謝去

登縹緲峰記

滙三州以為澤水始大中五湖以為鎮山始尊然三州之利不同而形勝亦異不厯其尊未易徧也而尊莫尊於縹緲峰其陽空虛無梯可至西為晉陵水最大山最遠第四峰臨之特親第四峰之於縹緲猶人之掉右臂北厯三嶠以由西面東踰莫釐以窺吳江秦家嶺臨之最親秦家嶺之於縹緲猶人之出左臂北為姑蘇城穹窿陽山或遠或邇厥疆不齊砂子嶺臨之最親由砂子嶺厯西湖寺躡峰之陰尤近是升峰之三道也然客終

以艱危為病常中陟而罷還於所親以求三方寧隘寧  
鬱寧受屏蔽而五湖之觀鮮克周徧正德庚辰十月之  
望中山湯子重太原王履約履吉客余之明日得第四  
峰之道輿舁以進蓋踰時而造厥巔也遊於空虛忽見  
大水下求千崙莫知所在客已有懼色矣居頃獲詢三  
州之形如螺如黛隱映烟際可以意求難以形辨然東  
北隱起非河非虹可指者靈岩浮圖也北為無錫其入  
最深可臆者陽羨諸山也西方不究厥始然卞山獨親

南屬蒼雪可接餘杭武康雪以東不得而擬矣於是三  
州始合象緯始親客始吐隘去結消釋壅蔽混元支離  
浮乎瀕洞覽乎杳冥超然萬仞之表矣時冬氣甚肅日  
白無色密邇天路非人宜居各杖策去蔡子記

林屋洞

范成大

擊水搏風浪雪翻烟消日出見仙村舊知浮玉北堂路  
今到幽墟三洞門石燕翻飛遮炬火金龍深阻護岩根  
寶鐘靈鼓何須扣庭柱宵晨已默存

再遊林屋洞

王鏊

蓬山有路那曾到，林屋無扃可數來。  
寶笈石函那復見，金庭玉柱為誰開。  
祇愁黯黯渾無地，又恐砰訇忽有雷。  
不是隔凡凡自隔，重門欲叩更徘徊。

過洞庭山

沈以潛

芙蓉縹緲隔烟霞，水國茫茫去路賒。  
一望湖光三萬頃，兩重山色幾千家。  
角頭有地皆栽橘，洞口無村不見花。  
范蠡何須重弔問，且尋漁艇作生涯。

遊林屋洞

烟霞縹緲洞中天  
白石蒼蒼路宛然  
月落岩頭聞鶴唳  
雲封洞口識龍眠  
毛公煉藥壇空在  
夏禹藏符世尚傳  
今日我來醫有道  
不妨深入見羣仙

遊林屋洞

徐禎卿

劃然中豁益然浮  
一徑微通玉府幽  
籠炬漸遙無燕擾

相傳有石燕  
遇火則觸滅

扶筇多躡有狼憂

余時有蹈  
坎之危

苔泥淺漬寒

濡足雲石餘筋銳  
觸頭丹刻縱存何  
處覓十年飽願只

虛酬

相傳有夏禹  
丹書石穴

遊林屋洞歸道中偶作

歷嶺循坡石路紆行邊濟弱有肩輿  
墻桑覆葉歇僧帽  
洞草分香上客裾  
積儉振家風俗美繁寒傷橘地租虛  
他年若為兒孫計  
合卜菟裘向此居

入林屋洞

王寵

白觀已仙去碧山遺寶符  
齋心扣靈闕企石窺清都  
雲堂梟撐柱百人可跼跼  
白玉斲隆棟青蓮綴流蘇  
昔人



煉液處牀第鬱金鋪石乳索而長交錯如珊瑚蛇行屢  
迴互磬折窮有無恨乏嵇生識鳥篆空模糊時聞神鉦  
鳴地底越江湖冥濛翳日月窈窕通蓬壺悠然遂雲卧  
心將天與徒羽毛如可就千載有龍徂

丙洞

天傾霞石開日映雲門敞芙蓉秀絕壁茁茁排仙掌下  
窺黯無垠側眺紛有象丹藤蔓氷堅蒼苔蝕銀榜野鹿  
浥飛泉寒兔逃外莽攀蘿眷仙靈折麻私向往訪道空

名山前途浩漭漭誰令獨世憂扣我陵意想

曲崑

乘雲歟先登扳厓紛廣眺孤峰上寒日平楚騰餘燒天  
高風物緊地迴山川竅饑飈乍陸梁哀鴻相叫嘯企石  
揖雲帆披霞迎海嶠空水空汎瀾虛無自余照林深養  
谷神壁灰團景曜光風爛芝苓玉髓滋蘿薦樵隱自夷  
猶末路多奔峭懷哉角里公千春可同調

林屋道中

海嶠雲霞虛翠屏，閭風吹袂采真行。  
壺中樓閣天齊動，石上瑤花冬自榮。  
遂有浮邱來馭鶴，似聞子晉解吹笙。  
金蓮玉柱千年閼，日月崢嶸媿此生。

遊林屋洞

胡纘宗

洞中別有天，我亦地中仙。  
屈曲山斜入，硨磲石倒懸。  
細繡禹貢讀，高枕道書眠。  
去去復幾許，龍宮還窅然。

同前

繫馬靈宮第九天，紫霞丹竈坐羣仙。  
金蓮空濶蛟龍鬪，

玉柱玲瓏日月懸  
改火欲烹山乳食  
掃雲初藉石牀眠  
隔凡不隔岳陽水  
黃鶴飛飛何處邊

林屋洞口古井二絕

王鏊

聞有紫隱泉

真語云包山有白芝又有隱泉之水正紫色華陽雷平山有丑公泉飲之除腹中之

蟲與隱泉水同味云是玉沙之流津也用以浣衣不用灰此為異矣

閱在靈仙境金庭不

可扣且此汲寒井

洞口有深井雲漿湛虛空  
我來攜一罌會與仙源通

縹緲峰

范成大

滿載清閒一棹孤長風相送入仙都莫愁懷抱無消豁  
縹緲峰頭望太湖

登縹緲峰絕頂

蔡羽

莫訝登高不用扶手招鸞鶴興如何環來島嶼人間小  
側去陽烏寒色多岩下雨來浮碧靄杖頭霞去落蒼波  
千年石上仙人迹為問王喬幾度過

登第四峰

青磴去已遠蒼藤住未能山高鳥不到天近氣先凝掃

石喜無事開岩初得朋落霞三萬頃俯首看吳興

登縹緲峰

王寵

宵夢升天行明登縹緲岑圍海湧鯨脊大漢冠鼇簪吳  
粵倦周覽乾坤莽浮沉千岳遞拱帶萬頃逼侵滛歆蒸  
塞靈灝氣候異陽陰寥寥躡雲磴落落捫河參鵬霄邇  
靈岳鳳野開煩襟倏倏空中語蒼虬烟際吟天衢非阡  
術超駕有遐音覽化自靡足懷仙傷吾心臨風寄瑤草  
遲爾崑山林

縹緲絕頂

絕頂親攀日月行五湖如帶自迴縈山川厯厯分南服  
今古茫茫混太清萬里風烟臨海嶠百年身世悵浮萍  
未驂鸞鶴雲車遠兀坐松杉濁酒傾

第四峰登眺

絕壁已天半迴峰獨翠微磴危尋薜迹風引曳雲衣野  
燒孤烟長川光落日霏樵歌深自好應飽北山薇

登縹緲峰

徐禎卿

靈峰峻偉挿吳天鹿道斜通密草間波暝遙疑下方雨  
烟明微見隔州山藥苗細染雲絲碧石翳重生雉尾斑  
塵骨未仙留不得剛風吹冷布袍還

與客至林屋洞

蔡羽

方丘茂草色五月入溪寒古洞仙媒引丹牀法友觀誰  
嫌靈迹隱我愛石樓寬袖得長生術常將鍾乳餐

林屋洞

張雨

山中春水泛蛻骨長於樹拏舟探穴口甚深不可渡窮



冬桃始華爛然朱光處

洞庭山

周鼎

玉柱金庭古洞天兩峰中斷碧波連歸來角里人如玉  
老去毛公骨已仙山有樓臺天在水地無蛇虎橘為田  
沙頭鷗鷺如相識曾駐輶車記昔年

自胥口泛舟太湖至洞庭

楊循吉

西望茫茫接幾州羣山無數障中流飛帆半日纔能到  
賭命今番始得遊城裏見天無許大漁中覓飯有何愁

橘洲渡慣心猶怯怪殺衝波一小舟

自靈岳至西洞庭四首

袁表

靈岳高處是琴臺舞榭歌梁已草萊西施洞指雲中出  
范蠡舟從海上來

龍爭虎鬪事千秋越壘吳宮麋鹿遊更分震澤為彭蠡  
亦有三江賽十洲

天開地缺浸方輿潏潏波濤混太虛縹緲峰頭看浴日  
毛公壇下閔丹邱

七十二峰天削成青蓮萬朵畫分明若為飛舄都遊遍  
不減蓬萊頂上行

遊西洞庭山記

夫覽山川辨物宜稽民俗舒性情遊之概也西洞庭去  
吳城百里予自胥口抵山館於林屋山人山人負經濟  
之學數奇而山居因山創樓名曰玄秀銷夏環其前縹  
緲倚其後山之勝萃於茲矣是日也遂登縹緲之顛山  
有九峰而縹緲獨峻援而上掖而前既登則東洞庭如

帶而七十峰特小湖中諸山皆若屏拱落日陷波中金  
紫萬狀遊之明日泛銷夏灣觴於小龍山而歸又明日  
渡蔡嶺憇明月灣登石公山山之陽有石坂其半沒於  
湖猶可坐千人乃相與濯足而歌曰山厓巖兮石如砥  
湖瀕洞兮百川委又觴而歌曰震澤定兮水朝宗億萬  
年兮仰禹功於是捨陸而遵舟復館於蔡氏明日乃遊  
上方諸寺山人知予將歸明日乃同遊毛公壇觀林屋  
洞洞深黑而中甚卑入者皆俯而進余獨與文子探隅

凡而出題其旁曰通仙隔凡洞之最深處也山人曰子歸矣山有曲巖其石如黛峻而秀不可以不觀乃觀之遂張帆而歸袁子曰西洞庭東南之沃壤也梅梨橘柑楊梅枇杷魚鹽茶竹之饒錯以良田山之人朴愿而信塗無婦人可不謂美乎自夫差以來不被兵燹抑又美矣同遊者伯氏邦正文子壽丞潘子修伯山人者蔡氏九達也復有諸蔡皆同遊歸之明日而記其事嘉靖庚寅夏五月六日

銷夏灣記

蔡羽

山以水襲為奇水以山襲尤奇也載襲之以水又襲之  
以山中涵池沼寬周二十里舉天下之所無奇之又奇  
銷夏灣是也灣去郡城且百二十里春秋時吳子嘗避  
暑因名銷夏自吳迄今垂二千年遊而顯者不過五六  
輩其不為凡俗所有可知已湖之山莫大於包山山之  
峰莫大於縹緲峰高不知其幾里長袤五十里有奇也  
峰之南水道三十里為茗溪其弗能與茗溪參者諸巒抱

其外也苕之北舟行三十里以求縹緲峰其勿能與峰直者亦諸巒為之拒也四面峰巒交萃獨以一面受太湖中虛如抱甕其南列門闕焉由門闕東西盼西為龍頭山其次為小洞庭為石蛇為舍為蕪為鼠鬪之石不得而名焉東為大小明月灣為石公為澤為厥為三山不得而名焉明月之灣其背為拔山厥土墳壚厥產林禽鴨脚櫻桃抽柿梨栗龍頭之背為圻峰厥土白礫厥產玉石盧橘中銷夏之腹印浮其上乍有乍無為衆安

之洲帆落洲上則四面環合為屏為翰聳妍効譎以與  
縹緲朝貢峰之巔有草無木其麓多木無草丹宮梵室  
蒙蔽林靄至鐘鳴鼓應然後知仙釋之廬魚行鳥過形  
影交徹帆翔其上而莫之知避也夫地既異而處甚僻  
信乎遊者之難至矣向使移置之附郭則揆壺觴秣車  
馬者日不暇給苟日不暇給豈獨為吾灣哉人將焦焦  
乎劍負以趨萬物失所矣夫造化無意者也設是灣如  
有意鬼神之能不得而與非冥契其事孰能樂之於戲



非惟世之人不得而樂灣之人亦莫得而樂也予世居灣上有所獨得私志之

銷夏灣

范成大

蓼汀楓渚故離宮一曲清連九里風縱有暑光無著處  
青山環水水浮空

同前

高啟

涼生白苧水雲空湖上曾開避暑宮清簟疏簾人去後  
漁舟占盡柳陰風

汎舟銷夏灣

周南老

湖流抱山曲平林俯風渚十里足清景六月不知暑陰  
厓振靈籟飛波洒涼雨桃笙凝翠濤梅寒生白苧水簾  
晝不捲恍疑眠洞府時異景亦殊湖上空延佇

銷夏灣二首

王鰲

四山環列抱中虛一碧玻璃十頃餘不獨清涼可銷夏  
秋來玩月定何如

畫船棹破水晶盤面面芙蓉正好看信是人間無暑地

我來消夏又消閒

同前

王寵

千山玩迴轉雙闕開嶙峋圍作玉鏡潭流水桃花春雞  
犬自甲子衣冠乃秦民表裏重湖阻丹青四望勾孤峰  
表日觀羣嶂摩天垠波光別駘蕩霞采相鮮新疑觴西  
王池誤攀織女津海鷗戲蘭薄游鯈瑩心神牙檣悲昔  
幸玉輦罷今巡榮華無常玩山水有天真塵纓聊以濯  
慚爾擢歌人

灣中覽古

帝子樓船上來渚宮巒殿海中迴山河錦繡千年觀  
歌舞風塵萬壑哀澤國魚龍吟落日荆蠻雲物悵登臺  
茫茫今古渾無賴直北長安首重回

練瀆

高啟

吳越水為國行師利舟戰夫差開此河舳艫試親練十  
萬凌潮兒林比飲飛健鼓棹急風濤揚舠逐雷電當時  
意氣盛謂已無句踐鷗避去沙洲龍愁閉淵殿恃強非

伯圖倏忽市朝變臺上失嬌姿  
泉間掩慚面至今西山月恨浸秋一片猶有網漁人時時得沉箭

同前

周南老

夫差習水戰決瀆湖之傍回瀾滙衝激破浪潄汪洋千艘連舳艫三軍練餘艘一鼓山岳傾再鼓波濤揚焉知君子卒潛涉江中央江湖利竝失兵弛不復張

奉陪太傅王公練瀆泛舟

蔡羽

山曉鐘冥冥石門樹厯厯餘霞蒸初陽微颺轉孤鷗水

宿凌晨光境絕欣所適回纜抱長川搜墟踐空壁古人  
練兵處滄洲長長荻冬曦娛公旌萬壑盡昭析

其二

逗舟網畧村假楫陽鳥居山從鏡心迴水接海表虛羽  
族憐珍華公行亦觀魚緣霞興悠悠度水行徐徐已叨  
形骸外獲奉談塵餘謝公從遊徒曳裾容散樗

明月灣

高啟

木葉秋乍脫霜鴻夜猶飛扁舟弄明月遠度青山磯明

月處處有此處月偏好天濶星漢低波寒菱荷老舟去  
月始出舟迴月將沉莫照種種髮但照耿耿心把酒酌  
水仙容我宿湖裏醉後失清輝西巖曉猿起

同前

周南老

秋高木葉下涼月照湖曲陰精濯浮金冰壺炯寒玉露  
澄彩奪鮮波涵光可掬蘭舟棹空明良宵清氣肅萬象  
森寒芒川澤盱駭矚把笛不敢吹湫龍豈容觸

同前

謝綰

湛虛一灣秋冷浸萬古色風定水自磨烟消鑑常拭澄  
光共涵映清氣交侵逼誰將廣寒宮移入水晶域眷言  
雲皎皎毋使雲霾黑

桃花塢

徐禎卿

猶有嘉名照荒寂百年塵跡已都非繫筐日煖桑錢貴  
沃土風輕荳葉肥草木歲深應委腐山原春好欠芳菲  
誰能更買千株種走馬來看十里緋

綺里

高啟



高皇本壯士提劍定四方晚為兒女情悲歌起傍徨愛  
子欲建儲寵姬方侍側顧驚四老人謂已成羽翼大臣  
豈不諫孰能幹天機彼翁何為者足見人心歸始潛避  
秦君終出安漢嗣世羅焉能羈舒卷聊自肆我來角里  
村如入商顏山紫芝日已老鴻鵠何時還斯人神仙徒  
千載形不滅猶想蒼苔中白頭卧松雪

登莫釐峰記

王鏊

兩洞庭分峙太湖中其峰之最高者西曰縹緲東曰莫

登皆斗起層波矗逼霄漢可望而不可即成化戊戌予  
歸自翰林文吳縣天爵過予於山中相與窮溪山之勝  
行至法海仰見異峰寺僧進曰是所謂莫釐者也文振  
衣以升衆皆繼之或先或後或喘或顛至乎絕頂而休  
焉天若為之寬地若為之闊西望吳興渺瀰一白有若  
雲焉隱見天末或曰卞山也北望姑蘇橫金一帶人家  
厯厯可數有浮圖亭亭曰靈巖上方也東望吳江雲水  
明麗帆影出沒若有若無蓋七十二峰之麗三萬六千

頃之奇皆一覽而在曰大哉觀乎相與席地行觴踞石  
賦詩久之暝色四合微月破林湖光瀕洞岩壑黯黯乃  
相與循舊路而歸焉語有之不登高山者不知天之高  
也不臨深淵者不知地之厚也莫釐猶爾况所謂秦岱  
恒華者哉予以是知學之無窮也故記之

望洞庭寄翠峰長老

陳基

一上堯峰望洞庭東山咫尺勢堪凌橘林霜老金千顆  
紺闕雲藏翠幾層弔古獨來尋晉宋酌泉誰與別淄渾

戴君自是忘機者  
相約同叅大小乘

湖上望西洞庭

吳寬

百家棧上望西山  
縱目遙過銷夏灣  
未遂真遊勞指點  
聊憑高興去躋攀  
石壇相距纔十里  
林屋都來有萬間  
報與山靈須少待  
會將親手扣仙關

和徵明登東洞庭

徐禎卿

塢僻雲深石徑紆  
漸從平履涉崎嶇  
烟迷遠景山藏屋  
林透微明日墮湖  
佳境到時應就宿  
肩輿停處合臨圖

莫釐絕頂君還上得似鄰峰縹緲無

又和遊洞庭將歸再賦

名山本自饒靈異還倚高人品價奇梵宇留將題壁偈  
水妃傳作步虛詞遙聞暗浪風生早欲發歸帆月落遲  
知是不貽猿鶴怨雲栖元未有心期

自西山歸東洞庭

王鏊

西來暝色一帆孤纔見青山忽又無白借天光猶瀕洞  
黑添雲氣轉模糊人家遙指諳來舊塵眼頻揩見却初

述作惜無摩詰句五湖烟景若為圖

與嚴太守道卿同登莫釐峰

微雨發春妍東風花外軟良朋約佳遊遙指莫釐巖平生山水心老脚肯辭繭壺觴紛提携曲磴屢迴轉小憩山之腰秘景漸披藏紫翠蓋幢翻青黃繡裯展須臾造其顛四顧目且眩太湖小汀滢風帆時隱見吳門俯可掇越嶠杳堪辨摩挲舊題名斑剝半苔蘚日斜下山椒官爾迷近遠問途值樵夫失脚悔已晚懸厓颺伶俚傳絕

壑窺渙忍熹微認前村山寺吠鳴犬解衣得盤礴仰視  
坐猶喘韓公鐫華岳正自恐不免登高勿知厭持用戒  
軒冕

登莫釐峰絕頂

朱琬

春山結伴好登臨萬仞烟霞屐齒深大海東迴拖白練  
羣山西走列青岑一雙日月懷間玩七十蓬瀛鏡底尋  
安得神仙不死藥餌之於此捫天心

疊前韻

殘臘已破春乍臨春雲布地春山深懸厓掛壁入蒼翠  
翔鸞舞鳳羅嵌岑六龍停車不敢度四海指掌亦易尋  
我欲乘風跨雲鶴翩然下浴瑤池心

洞庭山

范仲淹

吳山無此秀乘暇一遊之萬頃湖光裏千家橘熟時平  
看月上早遠覺鳥歸遲近古誰真賞白雲應得知

遊洞庭

湯仲友

寒色滿空山脩然一徑閒鳥啼黃葉外人度翠峰間古



殿藏雲氣唐碑帶蘚斑未窮幽絕處興盡忽思還

過洞庭

唐珙

西風吹老洞庭波一夜湘君白髮多醉後不知天在水  
滿船清夢壓星河

洞庭曲十首

金信

奇峰七十二菡萏青蓮開遙看出雲雨不似楚陽臺  
海客走相報龍王嫁女來雷車挾風雨高浪白成堆  
波濤三萬頃倒浸中天月蛟精戲神珠開扁白銀闕

洞庭西去浪出沒有雙雷遙看青兩兩不識具雪堆  
浩蕩太湖水東西兩洞庭吹簫明月裏龍女坐來聽  
毛公來刺船遂入林屋洞洞戶夜不扃風雷自相闕  
雌風吹雨脚龍腥湖上聞小姑彭蠡至來謁洞庭君  
日落洞庭波青山風雨作垂龍挂修尾有似青旂脚  
湖上望蘇臺水與青天遠長風送飛帆忽到長洲苑  
有客浮槎去槎頭挂客星仍將莫邪笛吹與老蛟聽

望洞庭

楊維禎

瓊田三萬六千頃七十二朵青蓮開道人鐵精持在手  
嘯引紫鳳朝蓬萊龍子卧抱明月胎須臾化作桃花腮  
爾雲槎子何處忽飛來蓬萊之淺今幾尺黃河之清今  
幾迴雲槎子云是自江上來但知東方生賣藥五湖上  
不知張使者北犯北斗魁雲槎子吾與爾何哉任公釣  
竿在東海潮壓桐江江上臺

洞庭曲十首

日落洞庭波吳娃蕩槳過道人吹鐵笛風浪夜來多

道人鐵笛響半入洞庭山天風將一半吹度白銀灣  
仙橘大如斗泛之過洞庭江神渾未識喚作楚王萍  
海客報奇事青天火甕飛明朝雷澤底新有落星磯  
網得珊瑚樹移栽瑪瑙盆夜來風雨橫龍氣上珠根  
海上雙雷島渾如灩澦堆垂龍拔山脚飛度海門來  
潮來神樹沒潮去神樹青雲裏天妃過龍旂帶雨腥  
客入毛公洞洞深人不還明朝探禹穴相見會稽山  
太夜象圓海金蓮夜夜開水中萬年月照見昆明灰

秦峰望東海雲氣常飄飄桑田明日事奚用石為橋

洞庭山

周南老

兩峰東西峙對屹具區澤波搖巒嶂浮雲開蒼翠積地  
古山有靈蛇虎絕踪跡林屋窈而深中有真仙宅靈威  
探禹符窮幽振金策信有不死方奚為異今昔

送人之洞庭

姚廣孝

西風飛錫渡如舟來向湖間作勝遊七十二峰青一色  
君看何處獨堪留

洞庭謠

東洞庭西洞庭兩山窵兀摩空青七十二峰在其下氣  
勢直與秋旻清太湖三萬六千頃芙蓉秀出雙亭亭湖  
底潛開林屋洞羅浮句曲通仙靈嵐雲水氣互出沒揮洒  
八極風泠泠晦明變化不可測波濤洶湧如山傾鯨人  
停織百怪屏滿耳澎湃千雷鳴魚龍騰躍鬼物泣帆檣  
摧折舟人驚斯須陽動忽開霽波平湛湛瑠璃明林巒  
無處不蒼翠島嶼日照花冥冥斯山景物豈止此千態

萬狀描難成中有空宅亦有仙人局  
毘塵不可到勝槩如蓬瀛  
神僧還迴看杯渡帝子下降停  
雲輶我昔畏險曾勿過  
兩山每對空傷情我歌洞庭謠  
請子為我聽何由乘槎尋子去  
翠峰深處藏餘生

洞庭毓秀歌

吳信

洞庭之山秀而靈東西屹立如畫屏  
試歌洞庭毓秀歌請君側耳為我聽  
太初元氣合胚凝上天好奇遣六丁  
鑿開混沌見兩青鎮以白玉之柱  
黃金庭副之七十二

峰碧峻嶒太湖一水清迴縈佳氣四時互鬱蒸儼如蓬  
萊三島浮滄溟大禹之功何有能真是天造地設成縹  
緲鬱嵯峨莫釐聳崢嶸勢如虎豹形若蛾眉橫日月互  
吞吐烟霞發精瑩草木蔥菁紫翠層靈迹勝景難具稱  
攢雲嶺上雲英英芙蓉山下花冥冥明月灣頭夜深明  
月明錦鳩峰頂春煖錦鳩鳴王母西來駐雲輶吳王銷  
夏醉夢醒樂天遨遊為揚舲子美水月鐫碑銘藥墩煉  
藥有蔡經仙壇仙人綠毛生東園綺里芝草茁紫莖雪



竇古井涵清泠翠峰浮來神鍾吼華鯨峯圻海眼瑩碧  
開兩晴林屋龍洞水氣腥中有石鈕石鼓扣之聲鏗鏗  
靈威丈人昔曾行神景宮中古檜如龍形上有百尺兔  
絲下有千年苓道人斲苓食之白日能飛昇古來遺跡  
信可徵總是樂遊耽遁漁樵盟未有政如房杜丈如班  
馬之輩出此垂芳名聖朝文化四海咸賓興國初伯昂  
山長殊有聲年來吳分當奎星山祇水后合獻禎多士  
濟濟皆登瀛東麓使君衣錦榮恢弘王綱闡帝紘少年

狀元何寧馨文魁名振白玉京蔡子干將出豐城藻思  
如刃新發硎後進雖未加冠纓文物禮樂能相承史君  
精神玉壺冰龍駒已膺月旦評王郎氣象百丈增風雲  
際會皆可乘偉哉洞庭鍾得天地精千年孕育今大亨  
虎邱蜎縮獅山驚氣勢直壓華與恒請君為我繼此頌  
太平

吳都文粹續集卷二十一

欽定四庫全書

吳都文粹續集卷二十二

明 錢穀 撰

山水

遊石蛇山記

蔡羽

龜鼃龍蛇之山大抵皆花石之材嵌者空竅潏者廉利  
然皆不於山之腹特出於波濤龜鼃龍蛇皆負林麓走  
飲於湖惟蛇山為不然當太湖之西北背龍頭而迎風  
濤截乎大洋故境愈險而愈奇世少得而觀焉正德己

已清明日與客放舟龍頭西踰小洞庭還見聚落十餘家為烏沙井厥石萬狀恍恍焉洞洞焉緣於峭岿不敢搖動然去蛇山尚十里客請乘東風之便乃從烏沙井解舟纜薄蛇山之東還見大石劃下若有門闕而無人跡顧其勢斗峭水尚急舟不能停緣壁里許則山之陽也岸始舒水始緩若有里墟而無烟火鳥巢獸窟以竄其間者大抵皆采石之人厥厓惟廬厥坎惟炊厥寢惟磯以漬以飲維石之宜始舟人與岸人見獲通語言而沙

潭詰曲未可進投竿測之視岸人所指而行焉始獲登  
登其丘山空地險舉足有聲躡其巔梯斷石滑側身而  
不能前復舉帆去則山之西麓矣壁愈高石愈赤若芙  
容開花魚龍蛻甲上者屏列下者橋卧隱隱波底者不  
可窮狀所見既異而境復迂僻由是鎖舟壁下環臥涯  
澌客皆引滿載歌晨徂而暮忘返夫蛇山掌石耳其勝  
顧出龜龜龍頭之上余與甚邇而平生不聞其勝一日  
跨波濤觸烟霧獲覩其奇則古之不言石蛇而言龜龜

者有以也噫物愈奇則遇愈難余志石蛇之奇俾好奇者覽焉

遊石蛇後記

山林之與臺閣其味不相堪非止甘苦也間有勉嗜之者得之必不深與之必不能相忘惟太傅王公則不然去臺閣投山林釋軒冕憩泉石若返古踐真曾無纖芥耳與目惟恐其不遠情與度惟恐其不廣一日聞濟陽蔡羽言石蛇之奇欣動不已即其歲己巳之臘八挾小

舸載輕麾奮發乎銷夏灣之上以羽侑座貳之以扣舷  
之客緣大小明月灣絕流西去瞬息而達蛇山簫管  
一鳴林谷振響山精水怪潛匿而不敢出乃與客冥搜  
乎巖穴循環乎溪澗扶搖乎梯磴之間高駕乎洪濤之  
上以吐納烟霧履峭絕跨蒼莽與健夫爭先而公不知  
倦於是水聲洋洋萬籟俱和通乎耳矣東過雲溪西過  
夫椒通乎目矣仰周八表俯接九淵通乎度矣鼉呼而  
鼉歡羽翔而鱗集通乎情矣山不必高王公一踐之三



萬頃之勝可以撫而有也雖老於山林者不如又何嫌於臺閣日欲落公手剝石衣書名於壁而去蔡羽記

過石公山

王寵

島嶼屢崩奔石林突參錯朝雲正吐秀冬水亦漸涸槎牙熊豹蹲蜷曲蛟龍蟠波濤激中洞嵐靄紛上薄金膏赤日流石鏡青天廓表靈徵名圖延賞諧幽諾蒼鼠不驚人丹楓時自落茲焉可投綸畢志甘場藿

思夫山

高啟

江上曾看望夫石湖中今見憶夫山夫君好采山中藥  
獨得長生去不還不似蕭郎與秦女乘鸞同去彩雲間

同前

周南老

峨峨湖中山山崦開石扉應知避秦者遠與世事違良  
人採藥去歲久不復歸天寒翠袖薄日夕勞夢思化作  
山頭石引頸雲依依山石或可轉妾心終不移

同前

王賓

夫來采藥避秦苛妻守空廬獨淚多非是妾身甘憶死

恐夫憔悴在山阿

思夫山相傳秦時有人採藥不返其妻思之至死故

名

望大小二貢山

王逢

大貢如大人小貢如小臣大人方正笏小臣亦垂紳太湖七十山而此我所珍清淑萃間氣端厚凝風神岳露蓮一朶海偃月半輪遠分馬跡秀近奪蛾眉真岫幌蔽素夕雲蓋擁高晨深谷虎豹隱幽絕狐兔隣將軍雖相

望邈若越與秦我行柯村外紫翠忽鮮新不無靈異栖  
飛度招隱淪洶洶白水波杳杳清路塵芳尊被中沍采  
之淚盈巾父老昧知識謂我諸侯賓我豈諸侯賓均是  
天王民

琴山

蔡昇

誰將太古琴橫向洞庭陰山泉泠泠響彷彿絲桐音

白浮山

水面有浮山色白勢窵兀浮焉胡不流非浮胡不沒

五浮山

有客報我五星流，闕向太湖為石頭。下有巨鼉負之浮，  
羅列水面如仙洲。不識其語誠然不誠然，亦逾萬萬秋。  
我欲汎彼木蘭舟，五處岩壑皆尋幽。只恐上帝不肯留，  
故遣夸娥二子收收去。人間何所投？五岳各與添一丘。  
山靈如此先當愁。

烏蚌山

烏蚌在湖水，水流蚌不移。圓月出山頂，疑是吐珠時。

綠石山

南山層層石非紫亦非白寒暑亘千古長是莓苔色

芙蓉峰

一朵金芙蓉雲根在土久伊誰能折之擘山巨靈手

玄龜山

山根有玄龜曳尾將若行夜雨長石髮彷彿綠毛生

西湖灣

湖水清湖堤平薰風芰荷氣急雨菰蒲聲灣中漁人夜

吹笛宿雁飛起眠鷗驚

禹期山

相傳禹會諸侯於此

王賓

堯時神禹會山崩洪水滔滔勢接天今日三州租賦地  
秋風禾稻自年年

射鶚山

吳敏

東山空濶原堊平吳王養雞築高城秋天饑鶚未飽食  
側翅下攫殊無情守城武士心孔惡旦夕窺茲捕雞鶚  
雕弓一展羽箭發鶚也時從半空落山人學射藝漸精

遂使山無鷄鳥鳴却思勾踐侵吳日何不令之射越兵

大小竹山

竹繞山山映竹山色長青竹長綠大小兩山何處同  
瀟湘  
圻頭淇水澳昨朝山上清風生翠梢遙動鳳凰翎  
今日山前晴旭照綠陰滿地鷓鴣聲鷓鴣聲啼未絕  
兩山雨溼琅玕節

登西湖小洞庭

吳鳴翰

卷波飛雪打芳汀扶醉來登小洞庭金闕芙蓉千疊嶂



玉壺天地一孤亭直須橫槊歌明月更擬浮槎作使星  
不獨坡仙誇嶺海茲遊還許冠平生

題煉墩

三江引去桃花水露出波心小玉屏四面海天涵地白  
一方烟霽破湖青登臨有客驚浮世今古無詩咏落星  
若使湖州仍見此便應添箇看鷗亭

鎮下放船過東山

范成大

打頭風急鼻雷鼾醉夢閒心鐵石頑惟有愛山貪未厭

西山纔了又東山

老禪竿木各逢場詩客端來共葦航  
一任顛風聒高浪  
滿船歡笑和詩忙

社山放船

社下鍾聲送客船凌波撾鼓轉滄灣  
橫烟裊處雞豚社  
落日濃邊橘柚山  
八表茫茫孤鳥去  
萬生擾擾一舟間  
湖心行路平如鏡  
陸地風波却險艱

東山渡湖

渡船帆飽如張弓，倏忽世界寒泚融。堪輿無垠日夜汎，浩浩元氣蓬蓬風。湖光日色不可辨，但見水精火齊合。集成虛空波臣川，后敬愛客約束秘怪駭魚龍。大千總作大圓鏡，光中飛度迷西東。蒼茫一身無四壁，八方上下惟孤蓬。毛仙出迎笑相問，何乃自苦荒寒中。吾生蓋頭乏片瓦，到處漂搖如寓公。猶嫌塵土礙人眼，茲遊勝絕餘難同。九衢車馬恍昨夢，付與一笑隨飛鴻。

歸自西洞庭阻風登黿山頂

王鏊

親朋挽衣留不住逆風舟向平灘駐灘頭寂寞誰與言  
青鞋飛縱顛厓步黿頭有山山不崩東望東海西吳興  
羣峰羅列七十二如拱如立如奔騰我行天下亦多矣  
所至有山或無水其間有水却無山何處能兼山水美  
蒼茫萬頃浮孱顏惟有海上三神山杳然可望不可到  
不如此地日夕隨我往與還胡為十年纔一到風乎爾  
知吾所好

登縹緲峰

仄徑盤空艱復艱快哉七十二孱顏星辰可摘九天上  
吳越平分一水間日轉林梢看鳥背烟橫谷口辨人寰  
居然自可小天下誰道吳中無泰山

明月灣石坡

巨石陂陀板樣平三山當面看雲生何當子夜重來此  
濯足滄浪對月明

石公山石洞

石公之景殊不惡巨石懸空歇不落爭知不是補陀山

中有仙人儼纓絡

石公山試劍石

懸崖峭壁立千尺有洞虛明忽中圻吳王寶劍烏能然  
恐是巨靈神斧劈

石公山

石公幽處無來跡亦有人家散阡陌我船欲開還不開  
愛此孱顏蒼雪色

崑山

滕繼

一水決辰外乍晴如酒醒臨谿照淨練陟巘到高青翠  
靄俯深樾黃雲迷遠垌超然信塵表風袂襲泠泠

同前

孫寔

絕頂地平易軒窓風怒號半空垂象緯四面湧波濤洞  
僻荒苔蘚泉深冷骨毛登臨欲忘返城市厭煩勞

登玉峰

陳省華

四望平川獨一峰前峰瀟洒是蓮宮松聲竹韻千年冷  
水色山光萬古同客到每憐樓閣異僧言因得鬼神功

縣民遙喜行春至鼓腹閒歌夕照中

同前

范周

萬疊青鴛壓巨崐四垂空濶水天分夜光晴帶三江月  
春色陰藏百里雲桂子鶴驚空半落天香僧出定中聞  
不將此境評張孟三百年來屬老丈

夜發崑山

范成大

歲寒人瑾戶霜裏獨登舟弱艣搖孤夢踈蓬蓋百憂但  
吟今不樂寧計幾宜休慚愧沙湖月年年照薄游



施元光在崑山病中遠寄長句次韻荅之

四海飄蓬客舍邊幾多雲水與風烟絕無膂力駢長轡  
空有孤忠誓大川參月忽垂征馬上斗牛應挂故山前  
親交情話知何許詩到天涯喜欲顛

舟過崑山與顧仲瑛姚子章張叔厚于彥成郊

九成聯句

楊維禎

二月二十日樓船下婁江破浪擊長艫楊驚颿簸高杠

梅峰遥古色

姚

石樹鳴悲腔躡磴屐齒齒

張

登堂鼓逢

逢地險立孤柱

郊

天岳開八窓烏升海光浴

于

鳶鷂風

力降番賦夾閩佑

顧

越謠襍吳嘯仙樵椎結萃

姚

胡佛

凹眉厖婆律噴獅鼎

楊

琉璃照龍缸曾軒坐疊浪

郊

落

筆飛流淙愛此韞玉石豈曰取大砭文脈貫琬琰

顧

密

韻含甕缸驅羊欲成萬

楊

種璧得無雙多今文章伯

張

萃此禮義邦龍駒幸識陸

姚

鳳雛亦知龐翠筭掉文舌

顧茜衲折幔幢敏思抽連繭雄心鬪孤鯨句神躍冶劍

才捷下水艘磬聲重寡和鼎力輕羣扛昆渠詩已就誰

詔隴頭瀧

楊

登玉峰

夏原吉

崑阜遙看小一峯登臨渾欲接青天神鍾二陸人林秀  
勢壓三吳地位偏岩溜下通僧舍井林霏近禡市塵烟  
幾時重著游山屐來訪當年種玉仙

同前

沈以潛

嵯峨千仞驀凌空滄海西來茂苑東勢轉江流三里外  
翠分嵐影半城中岩前有洞仙家近溪口無花釣艇通

聞說幽人茅屋底捲簾相對咏無窮

陪徐天全夏仲昭遊玉峰

劉珏

青峰高聳白雲頭今日來陪上相遊甫里晚烟紫茂苑  
洞庭春水接湖州山中未乏連城玉海上空聞萬斛舟  
勝會況逢全盛日蘭亭不減晉風流

登玉峰

吳寬

崑岡玉石未俱焚木樹危藤帶白雲小洞烟霞藏木客  
下方簫鼓賽山君千家居屋黃茅蓋百里行人白露分

更上雙峰最高處滄溟東去渺斜曛

賦得玉峰春霽

張適

玉峰小朶芙蓉秀嵐氣晴分翠接人一鳥啼殘蘿逕曉  
萬花開遍石宕春洞雲已出從龍去海燕仍來與客親  
此日登臨文學彥酒酣離思欲沾巾

秋日舟過崑山

蘋末起輕颺楓林葉漸凋孤村烟樹烏遠遲夕陽樵估  
客收村市舟人候夜潮偶因山水勝暫此繫蘭橈

舟中望崑山

王鏊

雲外孤峰欲墮江  
船頭風浪共低昂  
廿年舊事空回首  
山自閒閒水自忙

玉山辭為顧仲瑛作

陳基

山堪堪兮磅礴太古木蔥蔥兮雲英英而欲雨日朝出  
兮在戶光輝輝兮水流其下非君子兮夫誰與處采我  
蘭兮為佩褰我荷兮為蓋從子于山兮聊逍遙以卒歲

郎官柏詩序

金問

蘇之崑山古之婁縣也地大物盛為今圻內望邑按郡志城本吳子壽夢所築山在城中而石多因似玉因以得名自昔靈區奧壤紺園琳宇環布其下傳厯滋久完葺弗紹則委頓於荒烟野草之間至若名人達士高墳大冢皆厯厯在望仁人孝子於其先塋封樹等威禮所得為者宜無所不用其極矣其或世澤告衰而殘碑崩圯見欺於狐兔而增過客彷徨者自非有忠厚之人居可為之地烏能興起哉正統丙辰廣陽羅延齡由兵馬

副指揮來宰是邑既視篆即進父老詢民利病而興除之曾未決期政和歲稔輿情大悅暇日復從吏民循山之麓顧瞻徘徊喟然嘆曰山為一邑之鎮民賴以安而凋敝若此非古人教護屬功之意乃率其民相與植栢於上鑿石通路而塞其旁路疆理既嚴樵蘇絕跡且方事之際陰雲蔽虧霖霖時至未幾而條枚四合蒼翠彌望邑人感之名其所植為郎官栢儒林君子即其題為詩以美之兵科給事中王用節等謁予文以序其寔詩



不云乎維桑與梓必恭敬止靡瞻匪父靡依匪母蓋人之思慕其親而不見則寄情桑梓而不能已焉矧體魄之所安乎漢天子以之而來趙陀安君平以之而激密人之忿天理民彝有不容已者不待丁寧訓告而自然之應捷於桴鼓此郎官栢之名所由著也嘗憶徂徠新甫使無生植則亦魯邦之培塿耳而詩人咏之萬邦誦之千古之下傳之者豈徒然哉然則延齡之德與茲山茲栢同於不朽者寧不本於諸君子之言乎

郎官栢

張和

君不見河陽花胡為蹴踏餘塵沙君不見柳江柳一夕  
霜風變枯朽何如羅侯種栢盈吾崑佳氣鬱鬱山長春  
草間翁仲仰深庇泉下髑髏懷至仁層陰扶踈覆荒土  
夜半精神作人語喬柯秀拂寒空雲黛色遙連翠微雨  
穹碑用表吳民情大刻遂著郎官名我歌狂歌頌侯德  
千載芳聲播南國

馬鞍山在崑山縣西北廣袤三里高七十大一名崑

山寔因華亭之崐山而名縣境連接湖海而孤峰特秀上有浮圖其陽有慧聚寺東偏有山神祠西有文

筆峰

相傳孝宗時有魁星現於此

山巔有華藏寺南有桃源洞北

有鳳凰石及春風亭

夏太常景建

正統間知縣羅永年植

栢千章名郎官栢

登秦望山

薛據

南登秦望山目極大海空朝陽半蕩浴晃朗天水紅谿壑爭噴薄江湖遞相通而多漁商客不悟歲月窮振緝

早迎潮弭棹候遠風予本萍汎者乘流任西東茫茫天際帆栖泊何時同將尋會稽迹從此訪任公

秦柱山在縣南三十里十墩浦南帶海上有烽火樓基吳時望海寇一名秦望山輿地志始皇嘗登因名

綽墩

高啟

淳于曾解救齊城優孟還能念楚卿嗟爾只教天子笑不言憂在祿兒兵

同前

周南老

詆諧多滑稽啟寵納悞侮笑取玉環歡拍按育胡舞天  
寶志欲滿侈心日益蠱宮車遠播遷魄喪漁陽鼓胡為  
王門優有此一抔土遂令村之氓猶能三反語

綽墩在縣西十八里相傳唐黃幡綽葬此

虞山

孫應時

長嘯虞山迴天開風氣清南窺五湖近北覽大江橫  
歷三吳地悠悠萬古情雄觀有如此聊復記平生

遊虞山

倪瓚

陳蕃懸榻處徐孺過門時  
甘冽言游井荒涼虞仲祠看  
雲聊美翰把酒更題詩  
此日交歡意依依去後思

巫咸山

王賓

舊說巫咸已上天  
楚人歌裏亦千年  
相傳住處今何在  
一座青山縣郭邊

同前

王汝玉

平生不識海虞山  
覽秀曾因圖畫間  
雲入空濛開倒影  
僧依蒼翠閉禪關  
湖田種熟秋千頃  
烟浦舟行路幾灣

天上歸來暫停轡何當留我老年閒

登虞山絕頂有懷吳思菴

周忱

晴登孤嶂俯郊原指點東吳遠近村  
齊女墓荒枯樹老言游祠古斷碑存  
一泓白水通湖口數點蒼山近海門  
此地舊傳多勝跡重來期與故人論

遊虞山

吳寬

夜宿相川口清晨喚舟人舟人請所之  
指點虞山垠山如知我來笑迓野水濱  
藹藹春雨餘翠洗雲中身我本

重茲山竦然正冠巾虞仲骨已朽高名宛如新悠悠松  
間路弔古在茲辰放舟轉山塘行行自知津春服亦既  
成庶以適此春

同前

沈周

虞山我隣壤欲往路非遥比來有好抱風日虛春朝茲  
藉佳友興理舟訪堯峯漸喜蒼翠近豁眼嵐霏消上有  
古松杉落落旌幢標其下見行人往來襍僧樵我坐意  
亦馳宣脩雙屐超何異謝康樂巫湖眺且遨



三月九日舟泊虞山下

霽色澄虞山正與遊人偶一年無多月春三及秋九勿  
厭傾郭人隨俗悅親友春風若招邀處處鬧花柳林華  
競妍新無復見惡醜間見叢綠中遠映紅裙婦休云惱  
山谷點綴亦可取振趨識壯步屢頓驗皓首尚有散逸  
流列石自俎豆老夫目中盡未逐逐走况當氣力衰  
孤坐還可酒

拂水巖

李傑

六月西巖上南風拂石湍無雲何處雨洒面作輕寒

同前

沈周

只有看山是勝緣青鞋布襪且輕便天收雨脚賒今日  
我趁花時遣老年絕壁雲扶將墮石豁厓風勒下奔泉  
此來不愧空歸去旋構新篇揀竹鐫

陪邑尹沈侯遊拂水禪菴

陳言

百丈厓翻白雪堆下穿雲磴線縈迴元陽六月宜飛雨  
靜夜三冬忽隱雷花墮真疑龍女散地靈直訝虎跑開

八風不動摩尼淨藥我塵心入茗杯

遊拂水巖

黃省曾

玉趾遵虞嶺松途轉沈寥覓泉廻島曲攀嶂厯空遙雲  
壁懸垂漢風珠細拂霄王孫遊意遠命酒始相招

其二

振策凌丹壑珠琲散紫氛翠嵐浮峻日瑤髓下層雲榻  
借蒼厓卧琴將玉澗聞萬重湖樹迴杯酒接氤氲

舟中望虞山

吳寬

蜿蜒平野臥青山相見令人獨厚顏徒有詩篇曾記詠  
已無筋力再躋攀船頭旋轉凭黃帽水面低迷擬翠鬟  
舊日同遊者誰在欲從東老學清閒

與啟南遊虞山

斜日下嶺西落日滿川上晚色催人還輕舟復搖漾佳  
山難為別持酒忽惆悵悠然忽回首舟尾疊青浪故人  
知我懷捉筆寫其狀懷土心未除移山力何壯便如玉  
維詩終南亦可望流觀入中夜鼓枻起高唱

舟中望虞山

陳基

一望虞山一悵然，楚公曾此將樓船。  
間關百戰捐軀地，慷慨孤忠罵寇年。  
填海欲銜精衛石，驅狼願假祖龍鞭。  
至今父老猶垂淚，花落春城泣杜鵑。

遊虞山

陳蒙

埜店杏花紅滿枝，江南天氣早春時。  
青山笑我來何晚，白髮催人老不知。  
雲竇雪消龍澗滿，星壇樹偃鵲巢危。  
明朝欲盡登臨興，還赴雲間羽士期。

和計大尹虞山雅集

楊循吉

鼓擢琴川來駕言為近遊覽今化方洽宜俟即余謀張  
宴山之巔有酒滑如油雲開見百里南望古蘇州尚湖  
當其前揆時惟杪秋仁政召佳瑞岐禾鬱盈疇我醉屬  
公飲勿遺此遐甌言子本邑產古今契良投有月照松  
杉賓客起互酬擇勝重移席撫遠還登樓粲粲新篇咏  
迴若風馬牛良會誠亦難餘歡渺滄洲

次韻計明府虞山雅集

王鼎

西蜀春星杜老堂此軒高檜與天長且尋蕭鼎讀書處  
莫問夫椒是戰場空谷葉聲流晚翠遠湖雲影鬪秋光  
品題消得羅池客名勝如今定不荒

晚次虞山

皇甫湜

清溪杳無際望望溯行舟海縣雲歸市山城樹滿樓桂  
餘投綬興菊近授衣秋夜發東林磬冷然破客愁

虞山溪行

朝從虞阜出終日愛溪行鷗近看疑下雲遙望若迎嵐

昏作海氣風滿助江聲莫恨三山隔東看烟樹平

寺門望虞山

王寵

禪門吐雲氣前與虞山通大海蒸巨壑烟嵐日龍蔥蓮  
花挺秀壁繡幃羅高空飛泉四時雨福地千年宮蛟蜃  
時出沒青天乍舒虹是節屬夏首灌木敷丰茸鶯啼紫  
岩曲鹿驚青林中薰風蕩蕩萬籬沃雨鮮篁叢蹇予抱沉  
瘵未得窺玲瓏還期覽日出夜半千厓紅

虞山在常熟縣西北一里高一百六十丈周四十六



里六十六步

吳地記云孫權置虞農都尉於此故名按吳越春秋吳太子娶齊女病而死曰

必葬我虞山之巔以望齊國越絕書云虞山丘咸一所居則虞山吳越時已有之或云虞仲葬此得名一

名海虞或云海嵎

以東臨滄海

又名烏目山雖無峰巒而

蜿蜒起伏畧如卧龍上有土垠礧礧或疑其古冢而

不可攷也山麓有老君殿舊名乾元宮宮側有池

宋嘉

定間

又有雪井南有仲雍墓有維摩菴太公石屋傍

有石洞天將雨則雲氣出于中又西北為拂水岩厓石陡峻水奔注如虹凌風飛濺最為奇勝自南循山

而西有致道觀又西有招真宮昭明太子讀書臺又  
西則岳祠諸廟過吳王廟五六里有試劍石又有三  
石與石城石門諸峰錯峙下有石壇周八十步又西  
則寶嚴灣其北六里為破山

遊破山

僧皎然

雙峰百戰後真界滿塵埃蔓草緣空壁悲風起古臺野  
花寒更發山月暝還來何事池中水東流獨不迴

破山山居八咏

僧常達

身閒依祖寺志僻性多慵少室遺真旨層樓起暮鐘  
啜茶思好水對月數諸峰有問山中趣庭前是古松

其二

晚望立虛庭心心見祖情烟開分岳色雨霽減泉聲  
遠樹猿長嘯層岩日乍明更堪論的旨林下笋初生

其三

一室塵埃外悠然祇麼長睡來開寢帳鐘動下禪牀  
谿浸山光冷秋凋木葉黃時題諸祖意歌石看斜陽

其四

西來真祖意祇在見聞中  
寒雁一聲過疎林幾葉空心  
閒憐水石身老怯霜風為報  
參玄者山山月色同

其五

真性寂無機塵塵佛祖師  
日明庭砌暖霜苦藥苗衰汲  
水和烟酌栽松帶雪移好聽  
玄旨處猿嘯嶺南枝

其六

古寺凭闌危時聞舉妙機  
庭空月色淨夜迴磬聲移漏

轉寒更急燈殘冷焰微太虛同萬象相會話玄微

其七

老僧論的旨物物唱圓成踈柳春來翠幽窻日漸明禪  
心親石室蝶翅覆花陰好聽談玄處喬松鶴數聲

其八

祖祖惟心旨春融日漸長霜輕莎草綠風細藥苗香月  
滿真如淨花開覺樹芳谷前鶯囀處時聽話圓常

烏目山五題序

李堪

余被物役塗汙故羈於人務網於吏位誠此身為官府  
有也今四十加六年始覺老非欲而已至病不期而自  
來生何常而本空死如歸而共寂由是登水木之虛室  
過烟霞之美夜聞經梵之清韻覽香花之寔會則心悅  
以情動目爽以言發綺靡以文著冰釋以意達前月中  
隨漕輓牒治金穀事至常熟縣過烏目山其山左右前  
後僧居佛宇者有五因成題五皆率爾所作非高妙也  
大中祥符三年四月五日序

龍院

林下金仙坊苔門揜夕陽  
花飛殿塔頂池照雲霞光  
松老鶴仍下洞枯龍已翔  
中宵動清響一磬發虛堂

餘題興福寺延福院淨居院永慶寺散見諸寺下

破山八咏序

劉極

元豐元年蘇州常熟縣沙門思雅謁予言曰海虞之勝  
鍾於破山然林泉之勢遊觀之繁無近與遠傳之盛矣  
自倪郴州捨宅為寺數百年間偉人奇士往往間出而

人無知者願有以發明之余因而咏

興福寺

峨峨烏目山曾臨貴侯宅重房昔珠翠峻宇煥金碧泉  
激晨霞明松搖暮雲白宜爾山中人日輪自朝夕

救虎閣

三昧遊深恩結宇依蒼厓猛虎伏危閣拔箭非忘骸窮  
獸雖覆車危雀猶投懷况我見已忘而彼猶其儕

宗教院



妙義傳天台迷雲淨如掃初終雖五時修短自三草結  
隱非此峰獲藏亦真寶秋來月正圓獨照僧已老

龍鬬澗

白龍鬬危峰長澗落千尺靈泉應竒蹤高連暮雲碧寒  
影凌蒼厓清流動危石八月苗正枯猶能變甘澤

常達塔

圓昔探雙林庖言發南華萬里歸一空誰云正非邪門  
影搖青松曾迴貴侯車猶遺數層塔岌岌凌飛霞

懷述塔

妙理悟三伊巍巍抗奇節千尺岩下松蕭然獨凌雪珠  
影雖青黃月輪豈圓缺危石揚寒泉至今伴清絕

空心潭

碧潭發幽石瀟洒無纖塵寒光湛秋月有物難比倫羅  
鈎沉無魚千尺徒垂綸到此心已空何用濯吾纓

御賜鐘

大聲扣洪鐘萬里為彤庭鳥間樓影重星淡雲氣清餘

響繞岩壑林葉如回驚有客發深省塵耳非謬傾

題龍山

高九萬

古澗滄浪外精藍縹緲間木枯曾閱世龍老解分山鳥  
道秋迷迹禪房畫揜闕詩成游子去流水自潺湲

破山世傳龍鬬而山破故名上有興福寺又有鬬龍

澗旁有硃砂洞放生池慶元志引山海經曰虞山之

北岡壠相接即烏目山

今頂山之南有烏目澗疑即此也

自此東北

九十步有空心潭

取唐人常建詩潭影空人心之句

又有舜井

秋晚有懷頂山

孫應時

小山搖落故淒涼，想像登臨野興長。  
萬里晴空初雁入，一年好景又橙黃。  
極須痛飲償秋節，生怕踈鐘報夕陽。  
搔首故園歸未得，籬邊寒菊為誰香。

秋晨至頂山

散目秋郊趣早涼，纖雲不點鏡天長。  
松杉沐露連天碧，秔稻眠風萬頃黃。  
可惜文書妨勝日，又還時節近重陽。  
小山叢桂相撩得，故故隨人作陣香。

中夏獨遊上方

澗水有奇觀山蟬發清歌  
穹林翠光合深谷涼風多  
孤遊轉寂歷佇立久婆娑  
吾生正須此欲去意如何

六月宿山禱晴

鵲為初晴喜山如秋夜涼  
蟬聲起竽瑟雲影散牛羊  
神理應難昧民憂敢自康  
平生靜中趣未厭宿僧房

詰旦喜晴

一壑有幽意三年幾獨來  
龍鱗松薜荔翠羽石莓苔  
潤

喜朝光動清知嵐氣開山前迎父老同作笑顏回

宿頂山白龍祠

梅詢

千株碧樹挿雲立一綫紅泉透石飛童子怕寒爭閉戶  
夜深風雨有龍歸

頂山上方

程準

雨歇黃梅後秋生麥熟前偶因金馬客來訪玉龍泉竹  
葉一尊酒榴花五月天不妨扶拄杖行到白雲邊

頂山

周霞賓

路轉清風徑泉通古石橋規模靈隱小景像上方遙書  
壁藤牽袂尋源草沒腰每懷登覽日東海暮生潮

遊頂山龍潭

李光

招提清絕冠諸方谿繞山圍勝氣藏好在池塘存舊址  
依然花木隱禪房風生殿閣元無暑雨後松篁自有香  
日暮不教清興盡更登絕頂瞰微茫

頂山在破山北十二里上有齊女峰

相傳齊景公女葬此

白龍

池在焉西北有水簾洞兩水合流從石厓下注漫流

若簾云

福山

徐有貞

冒雨衝風泛綵舟，共君載酒七峰游。  
海門東望天連水，江市西來樹隱洲。  
喜有錢劉新著作，能無王謝舊風流。  
登樓莫漫題詩句，留與山僧作話頭。

同前

李傑

九日携壺上金峰，海天萬里淨秋容。  
百年幾度尋清樂，廿載重來認舊踪。  
漠漠水雲開復合，離離霜樹淡還濃。



當時老衲今何在  
窓下依然偃一松

福山在縣治西北四十里高九十五丈周五里本名  
覆釜唐天寶六載改為金鳳後梁乾化三年又改今  
名山麓有東岳行祠

鳳山

徐恪

家林原在鳳山前  
綠野茫茫際讓川  
直道曾遭展禽點  
知機不似季鷹先  
悠悠往事今何較  
落落虛懷我自便  
卧起兩峰如濯翠  
爐薰聊復對遺篇

遊秀峰

即河陽山

楊維禎

河陽山色畫圖開絕壑懸厓亦壯哉  
華表不聞仙鶴語醴泉曾引鳳凰來  
玉魚金盃埋黃土石獸豐碑長綠苔  
獨有桓桓丘隴在秀峰相對讀書臺

同前

陳繹曾

平生丘壑愛躋攀此日披圖意任閒  
江浙去題龍虎榜海虞行看鳳皇山  
鶴來華表千年後雲在丹厓萬壑間  
聞有青囊書卷在訪仙求術待秋還

登鳳皇山次徐亞卿韻

王鼎

身世平生此石坳，只應猿鶴是心交。  
謬勞神物護丹鼎，豈有文章奪鳳巢。  
山鬼吹燈扃夜戶，石泉分茗赴齋庖。  
苦吟未就渾忘寐，雲外霜鍾莫浪敲。

河陽山一名鳳皇山在縣西北四十里高一百二十

丈周七里山頂有井嘗出醴泉

見永慶寺碑

又有梁朝古

檜及唐狀元陸器讀書臺

登穿山

劉珏

屹立晴沙翠作堆是誰移得小蓬萊雙厓不逐秦鞭去  
一穴渾疑禹鑿開挾雨龍從雲裏出看花人自洞中回  
酒酣倚杖層巔上笑指滄溟水一杯

馬進士抑之穿山送別用前韻

五典三墳滿案堆君才不讓呂東萊池邊夜月蘭舟泊  
花裏春風絳帳開已見陳蕃待徐孺還期孔子鑄顏回  
多情最是穿山色飛入離筵送別杯

穿山

徐有貞

一拳秋水骨兀立浦雲邊地僻通靈島門開似玉關碧  
分芳草色蒼入古苔斑為有劉安客題詩咏小山

同前

陸景

早朝天上黃金闕墮落腰間白玉環愁殺奚奴尋不見  
却來此地作穿山

同前

陳蒙

石門空虛誰鑿闢薜荔挂影蒼苔積懸厓偃樹鶻栖巢  
古洞出雲龍啟蟄

穿山在州東北五十里高一十七丈周二百五十步  
中有石洞前後通徹故名臨海記曰海虞穿山下有  
洞穴高十餘丈昔有海行者舉帆經其中今考其洞  
上猶通人往來而其下為地去海已遠舊屬常熟縣  
今分隸太倉州

鎮洋山記

在州治後  
壘土為之

祝允明

弘治十年蘇州府新建太倉州成遵詔命也堪輿肆  
其樞烝黎矢具鑊而巡撫右副都御史朱公瑄建白之

太守曹公鳳主維之同知萬公祥等申畫之所以造規  
考工凝績垂遠咸出於州守李公也初治廨既立百具  
皆作而相維汾州之東滄溟環輸搖汨滔漾萬古不休  
雄邦屹然傲睨踞壓而萬井衡夷無標極之形於是即  
廨宇後築為崇巒肖像三山中隆夾亞堅壤豐積樂石  
竒疊材木蔚章鳥獸馴集爰乎摩蒼霄嶷乎跨黃祇風  
蟄氣迴情愜勢到足以聯絡地軸支控鯨渤而又為亭  
者三居山之前者曰迎仙次曰來仙西偏曰遊仙為洞

一居山之麓曰集仙既成州人謹聳征商歸矚夷倭附  
服餘舶安流伯若興寶龍魚帖居乃稽勲名山謂之鎮  
洋同知州事周君明令義官鄭餘慶請記夫兩儀育物  
而川岳奠位王公設險而城隍作藩肇州封山其來久  
矣又况維洛食而周鼎定咸陽峙而漢闕依形相之方  
孰可違廢然而不藉賢宰疇匡聖圖故龍門砥石禹成  
舜功南交銅柱援標漢業厥今沙海漸暨揚波不聞所  
謂龜筮協從神鬼受職因民而利職競由人然非深不



足以經遠非明勿庸以輔幽有如茲州倣構斯山固興  
化機物情未云周審今則地理順謚水土平康物性充  
而形勢強陰陽和而陵犯解易曰后以財成天地之道  
輔相天地之宜以左右民臣也者承君之義以致之民  
者也則鎮洋之創我后知始臯公作成乾坤交宜人物  
攸賴宜不謂財成輔相者歟非天下至深至明其孰能  
與於此惟李公抱英荷傑直氣凜凜殆乎海其知而山  
其仁者也蚤由進士簡擢御史繡斧所指霜憲峻肅當

道駟豺黥落仗馬廟堂揚明特起茲任然臥治東孺絃  
歌難割非大賢之路明辰大行獨留魏聲共山無折則  
民之懷矣永以有託公名端字表正棗陽人董其役者  
陰陽典術瞿坤醫學典科杜壁也允明既纂瑒勒懿綴  
為銘詩詩曰

繹繹新州嶠嶠崇丘拊寧大流厚土崔崔剛民差差坎  
絡坤維三壺委形日觀授明五岳連衡陽侯效職波臣  
屏息其究安宅都臺建勲羣公秉鈞凝於州君六府維

修人謀鬼謀以承天休乾清坤夷蒼生熙熙重譯抵一  
股肱其良庶事其康獻於天王

又記

桑悅

孔子曰譬如為山又曰為山九仞傳曰丘陵學山然則  
山猶可為可學者歟太倉前橫婁江東接巨海元之至  
元十九年宣慰朱清張瑄於此通海漕兼市易海番遂  
成華市延祐元年以崑山州治徙之於此後因海盜陸  
梁州復移崑山我朝吳元年立太倉衛洪武十二年分

立鎮海並治一城荷戈與操耒者游居歲久芒頓弗倫  
怯膏饑強弘治十年巡撫右都御史朱公瑄奏聞欲割  
崑山常熟嘉定三邑地之切近太倉者立為州以扶抑  
之上曰俞廟議僉曰驚悍欲歛跂弛欲繩纏組欲劃攝  
裕展拓克勝厥任者毋慮屈一人以伸全州人咸以湖  
廣之棗陽李侯端素以學行名於時登黃甲官六察平  
生直道而行有忤權貴久淹下僚非斯人勿克料理是  
州其驥足又滯一方混同衆寡筭利害不足為侯惜乃

推侯為州守侯至任經營百方整齊州治凡門堂牢庫  
學校壇宇之屬煥然一新又念州中山寡密邇巨浸惟  
土足以勝水效東坡治徐造黃樓意遂於州後隙地因  
陵為高命典術瞿坤董工採土築為三峰下連坡坂點  
以奇石山成侯名之曰鎮洋蓋欲茲山運神畜靈利如  
五兵之在庫險如長城之臨鄙威如宿將之坐帷幄而  
凡浮泡微沫足以攔途抗屨與夫鯨波陸飛蕩析居民  
之禍永永其無有也侯心其厚矣哉方為山之初侯與

予相其向址告予曰予欲於其處為山山之上下植以  
錦卉并後凋難老之木絡以亭館公暇與州士夫觴咏  
其間論道古今斟酌民瘼不亦可乎予應之曰侯廊廟  
之具浮沉州縣多厯年所公道不泯近司銓衡者舉侯為  
四川監司官名聞於上不久將為圖南之舉正王元之  
所謂未知明年又在何處者侯能一日樂於茲山歟侯  
笑而不答雖然已之與人相為盛衰草盛則衰穀已盛  
則衰人故為已千歲計者則不為人一日計計人於千

歲者則不計已於一日理之必然者也侯自為吏持廉秉公信於老稚已不待言及治茲州興哀舉廢立綱陳紀恒如不及至於重繁纓惜餼羊辦一身以當是非毀譽之衝凡百建立懇懇若為曾玄計者正與為此山同果望身享其樂邪使凡為吏者皆能克其為己之心克之又克馴至於無己已無己斯人皆已如是則利與天下同樂害與天下同憂堯舜君民之道有外是哉若侯者亦可謂不負於吏者矣予舊常熟人新徙名數於州知

侯心事最詳因州判官浙江之蘭溪龔侯詔求予言勒石以垂永久遂為紀其事如此嗚呼開州鼻祖侯功不刊州人後世亦為美談曰猶望高子可望是山

贊

陸晨

巍乎高哉惟茲鎮洋三峰拔秀五岳獻祥一簣之土一拳之石積之衆之成此茂績卓哉李侯出計孔奇夸娥巨靈天寔相之鎮我海陬固我地軸壯我一州登我百穀路不拾遺海不揚波四境莫安所藉者多龍蟠虎伏



鬼護神守窈窕岩岩蒼蒼茫茫有玉可韞有豹可藏紆  
紆徐徐盤盤曲曲路轉峰迴深奧幽獨旁栽嘉樹襟植  
幽花思流雨露秀發烟霞雲氣結構嵐光瀕洞韓詩態  
狀諸或兼共侯惟公餘委蛇徜徉一躋其巔俯觀四方  
民有顛連舉在侯日照被窮陰侯心似燭思玄桑子文  
章大家為侯紀功上磨其厓小子昭甫目擊其盛歌頌  
攸宜蕪詞罔稱投之山靈侯德用昭地久天長山無動搖

登鎮洋山

沈周

水滙風衝海渺茫  
新州東壓示雄強  
白滔萬里登臨近  
青並三山指顧長  
歲久魚龍扶地軸  
春深草樹發天香  
邦侯卜築功成後  
從此波濤不敢狂

太宗文皇帝御製寶山文碑

嘉定瀕海之墟當江流之會外即滄溟浩渺無際凡海  
舶往來最為衝要然無大山高嶼以為之表識遇晴晝  
風靜舟徐而入則安坐無虞其或晝夜烟雲晦冥長風巨浪  
帆檣迅疾倏忽千里舟師勿戒瞬息差失觸堅膠淺過

取顛躓朕恒慮之今年春乃命將士相地之宜築土山  
焉以為往來之望其趾東西各廣百丈南北如之高三  
十餘丈上建烽堠晝則舉煙夜則明火海洋空濶遙見  
千里於是咸樂其便不旬日而成周圍樹以嘉木間以  
花竹蔚然奇觀先是未築之前居民恒見其地有山影  
及是築成適在其處如民之所見者衆曰盖有神明以  
相之故其兆先見皆稱之曰寶山因名其所稱而不易  
遂刻石以志之詩曰

滄溟巨浸渺無垠  
混合天地相吐吞  
洪濤駕山嶸嶸奔  
巨靈顛顛相噓歆  
揮霍變化朝為昏  
駭神褫魄目黯昏  
蒼黃拊髀孰為援  
乃啟茲山當海門  
孤高靚秀猶崑崙  
千里示表鬱燁燁  
永令帆濟無憂屯  
寶山之名萬古存  
勒石悠久同乾坤  
永樂五年四月初九日

寶山晴雲

高宗本

馳驅萬卒一山成  
寶藏含輝雲自生  
隱約壺天浮瑞彩  
依微海市弄新晴  
從龍目駭番船客  
捧日歡騰水寨兵

珍重吾皇洒宸翰千年草木被光榮

寶山在嘉定縣東南八十里依仁鄉永樂十年三月  
平江伯陳瑄督海運築為表識上建烽火高三十餘  
丈周圍一十五里

震澤賦

有序

朱右

按禹貢震澤底定在揚州之地說者謂太湖也國語  
太湖韋昭注即五湖也書謂之震澤爾雅謂之具區  
周官職方揚州藪曰具區浸曰五湖又似與之不同

吳越春秋又名笠澤吳地記云五湖者菱湖游湖莫  
湖貢湖胥湖漢貨殖傳吳有五湖三江之利太史公  
自序亦云登姑蘇望五湖愚意震澤以其震蕩不定  
而名具區以其既定而草藪聚為義而五湖者又太  
湖東岸五灣渚水之別渚今連屬已春秋時釣笠澤  
漢傳吳志指為五湖皆即今之太湖也於是推本作  
震澤賦以極庶類之繁衍明禹德於不朽其辭曰

客有鄒陽生號遠遊公子倣儻瑋瑰超竒拔偉衣白雲

之翩翩巍巍冠之韡韡神恍恍以欲逸風飄飄而凝佇  
於是上會稽探禹穴訪遺踪超洞壑輶車前驅輜重紛  
錯王子進之以笙鶴江令贈之以芍藥遂乃揚帆錢塘  
鼓枻中吳將欲窮覽山川壯遊江湖造松陵主人而歡  
然從予主人曰子號歷覽亦嘗聞澤之大有三萬六千  
頃者乎生曰未也可得聞歟主人曰唯唯夏名震澤周  
曰具區下屬三江寔為五湖右接天目宣歙出溪之源  
左通松婁中江入海之如衆流之委羣利之儲茗溪出

其南溧水經其西五灣瀦其東垂虹界其堤流甘泉之  
清液隱雪灘於北隈洞庭中起林屋天開渺彭蠡吞雲  
夢駕雷夏軼孟諸杳不知其幾千里之遠疇能記三萬  
頃之有餘其澤則汪洋浩瀚洶湧澎湃潏漫渟渟渙  
渙汙汙流颺吹波結絡龍鱗日光玉潔澄澶氤氲清瀾  
凝漪錦花成文浪濤噴瀆澎湃汙汙出雷騰虹蒸雨生  
雲吸呼陰陽吞吐乾坤如潮汐之不測或早暮而異觀  
飛揚蕩薄迅復汨淪千態萬狀蓋不可殫論其藪則碧



沙漫衍黃石碣碣莎薜蒹葭白萍青蒲荇片蘊藻芡菰  
荻蘆蔓菁杜若江蘼薜蘿芡實雞頭草長龍須芰荷翠  
沃蓮藕芬專衆物居之何可勝圖其土埂則塗泥微露  
埤溼就乾葳薺蘆蒿茝芷蘅蘭菖蒲馬荔荃蓀射干巧  
楊絮白水柳葉丹蘋蓼早綠榆楓暮殷朱橘火齊黃柑  
金九連枝並秀駢集乎其間爾乃周流梗概溥覽欄斑  
兩兩相峙蔚乎崇山其山則層巒崑崙疊嶂嶙峋岑嶽  
參差如陵如墳崔嵬巖崖陀陀糾紛上拔伋岡下臨湄

濱控地軸以磅礴逐水曲而折旋馬跡屹立以嶷嶷翠  
峰峻拔以盤桓曼浮雲之流景俯蛟龍之深淵空谷豁  
舒以無底磴道蜿蜒以相連其中乃有奉真之祠供佛  
之堂琳宮道觀梵宇禪房雲烟縹緲金碧焜煌黃冠緇  
衣來往而尚羊談玄贊空學幻言咙或登座以演法或  
擊鮮而稱觴駕白魚之飛舲泝重沚之流光水產則黏蟻  
旋螺土蛤石花鮓鱧鯽鯉鰕鱖鮓鮓縮項之鰻鮪尾之  
魴細鱗之鱸紫甲之蝦稻蟹盈尺脬螯載車長蛟巨鼉穹

龜靈鼉周遊涵泳其樂無涯羽禽則晨鵠莊雞鵲鵲鳬  
鷺交燕鵲鵲鵲鵲鵲鵲鵲鵲鵲鵲鵲鵲鵲鵲鵲鵲鵲鵲鵲  
鷗鷺忘機王睢並鶩屬玉交飛振翩刷羽以遨以嬉來  
如風飄去似烟晞若乃絕岸之濱漸水之石或伏或倚  
或側或立或方如珪或圓如璧或矗如峰巒或平如几  
席或滑如脂肪或廉如劍戟或赭而赤或蒼而碧或皎  
如玉或黝如漆為中流之砥柱若逆河之碣石恠恠竒  
竒熒熒磔磔斯又天造之神功而出於茲水之蕩激也

思昔夫差競伯圖勲麋戰於此勝負未分旌旗蔽空舳  
艫如雲始魚鼈以為樂終麋鹿以成羣乃若歸釣之徒  
著書之士去國鳴夷汎舟西子亦復渺渺滄波茫茫白  
水主人之辭未終鄒陽生肅乎改容喟然而嘆曰甚矣  
世道愈下而人心之不古也吾子好學頗識典策不述  
職方之經邦而盛稱茲澤之庶殖不思禹績之胼胝而  
徒嘆英賢於戰國皆非所以極游覽之望而察五行之  
至德也遐思往古擊節太息請即主人所聞而陳予之

所得嗚呼噫嘻浩蕩方割懷襄未平九域混而莫辨百  
潦雍而不行支祁崛起於淮甸天吳披猖於海溟時維  
茲水震蕩靡寧淳淳洶洶若轟轟疑撼天而動地猶  
駕雷而鞭霆類不周觸而天柱折若巨鰲扑而洲島傾  
斯震澤之所以錫名也迨夫九載既南庶土交正波神  
受職川后奉令應龍畫地以効功庚辰持戟而制命導  
吳淞以安流別淮海而表境於時澤安其所水順其性  
鳴者自停動者自靜斯震澤之所以底定也千載之下

美哉禹功昏墊之害既遠灌輸之利無窮故漁人舟子  
之出入豪商薄宦之經從擊楫鼓浪引帆隨風莫不連  
檣接觸往來乎其中斯又具區所以出萬民惟正之供  
也方今海宇清明朝廷寧謐內宣民化外修貢職農安  
其耕女效其織工習其業商估其直士守遺經民食餘  
力風不揚波水不濫洑方鎮以寧土地墾闢開禹之疆  
廣禹之績是以九州之外咸仰聖育沾濡乎仁義涵泳  
乎道德浹洽恩波沐浴膏澤漸摩浸潤流行洋溢天無

亢燥之灾人樂沃土之俗試言其故則辟雍湯湯聖化  
行矣靈沼洋洋聖澤汪矣御溝溶溶生意茫矣溥德  
川流達要荒矣下視一隅寧不隘杯水於坳堂矣主人  
於是竦乎樂聞憮然自失仰禹功之長存慨餘子其何  
益相與鼓枹乎滄浪曾不芥蒂於胸臆乃起為詩歌以  
頌德詩曰

於赫禹功配天比隆生我遺民宅於土中原隰昉昉江  
漢為東萬世永賴惟禹功是崇 於皇禹德立我民極

手胼足胝救焚拯溺鑿井而飲耕田而食靡謝天功焉  
知帝力 於昭太上示民以應眷祐我皇與民立命開  
禹疆土繼禹作聖其混合四大維民之正 於穆聖皇  
惟上帝不常敬哉有土疊疊不敢康五岳四瀆七澤九  
岡各修其職來享來王 來享來王受天之祐于萬斯  
年瞻我有土有土有民有子有孫有引勿替以頌斯文

太湖賦

王鵬

吳之有太湖彷彿乎三萬六千頃寔水德之所鍾乃江



南之佳境跨三州而無限納大象而絕迴隸淮海之維  
揚賴禹䟽而克靜匪歸虛之可方或雲夢之堪並觀其  
浩漭潢洋瀾漫渺茫沉沉隱隱訇磕砰磅動盪地軸噴  
薄穹蒼尋源委而未涯混朝宗而有常鄙網絡之羣流  
包涓滴之濫觴鼓洪濤之激逸沃玉蟾之盛光扇大塊  
之怒氣蕩陽烏於扶桑灑灑乎不可以際飄飄乎莫之  
能傍涌焉如霧勃焉如烟泫澄澹沱泓潏潏延陽侯崛  
強而起立馮夷織翠而周旋象未凝之胚渾器已極之


幅隕曠矣哉習坎之道不可以計往而弘兮罔知津來  
而濶兮渺無備此則太湖之大畧也若夫大魚崢嶸老  
蜃螺蚌巨鱗濯錦而展綃長鬣拂雲而捎斗其靜也則  
風烟帖寂四望一碧其動也則驚濤觸天高浪沃日掀  
掀而林谷俱振吞噬而舟航若失其涵湟之際璇環  
之中玄陰連屋而燭夜珠光抹電而燒空神鰲怪鼉間  
見詫出聳兮可怖邈兮可踪復有豪漁旅旅千檣萬櫓  
挾任公之奇能效龍伯之步武運若林之筌苓列排雲

之網罟然後鬣掉尾振迅儵撇若曝采赤腮晃淵起溺  
大者丈餘小者數尺或迎網而自獻或飲鉤而可得腥  
烟蔽昏數不可極其山則有東洞庭巖巖然如立其上則  
有神人之府真仙之宅乃左神幽虛之天南接羅浮北  
通岱岳王屋東連蛾眉西達故謂之洞庭地脉及有招  
提蘭若丹青烜赫其石則如煤如鐵銛訝瓊瓏透眼穿  
穴龍虬蟠結虎豹巖嵒文士卑以楚辭諂人貢之魏闕  
其松則連雲卧島捫參歷昂修百仞廣合抱材中棟梁

勢凌穹昊上有白鶴飛翔下有蒼麕出沒其中民居如  
城如市鱗次櫛比駢甍連塲華榱接址大者則有陶朱  
猗頓之流海賈番商之侶索貨如阜鬻產成庾靡分毫  
倪惟利是務間有以經史為生涯付光陰於膏晷道宗  
程朱詩法李杜作為詞章雲騰川鶩亦有務光巢許之  
徒長沮桀溺之輩待玉帛如塵囂覩爵祿為泥滓樂考  
槃以自適耐枕流而成趣家必有園則千頭木奴飽霜  
爛目其他櫻桃枇杷楊梅盧橘梅杏桃李蒲萄椒栗棗

索如綴照曜風日翳游目之觀瞻寔卒歲之衣食更有  
餘峰七十有二燦焉如羣螺之墮玉盤者又豈勝悉舉  
其跡哉辭既客有舟而過者曰子之知太湖之樂者如  
此而可懼者則有未知也是猶知火可燃灸而不顧其  
燬裂之禍知水之可飲可滌而不顧其沉溺之患者也  
先生曰噫予非不知也經不云乎飄風不終朝驟雨不  
終夕天地尚不能久於其常吾惟謹於涉而簡於出寧  
拚關高卧之固守何知揚帆騁興之取忒故當順其變

之足慮難保乘其勝之偶得也歟客喜而歌曰齋齋  
太湖其波漣兮覃及四方王道平兮先生於是乃膺再  
歌曰太湖之深兮可以養我之心兮太湖之浩兮可以  
泰吾之道兮客乃胡盧舒襟揮袂再揖辭謝鼓枻而去



吳都文粹續集卷二十二